

BUKLISTO ME SWASWANA

NA KUSAMBILA BITEKI



Yayi kele ya nge. Mwa kima yayi samu na Mama. Pesa yawu na . . . ? . . . Mpe nge me yidika yawu mpe kuna mwa . . . ? . . .

Matondo na nge, Mpangi Neville, Mfumu sakumuna nge.

Mbote, bankundi ya munu. Ya ke ntangu ya mbote na kuvutuka diaka na tabernacle na suka yayi, na nsatu ya malu-malu mpe ya mbote. Mu vwanda lenda ve kutuba mazusi. Mu kuzwaka mwa mikolobo yayi ya fioti yina ke tambulaka awa, beno zaba, yina ke kotaka na laka ya bantu mpe ke pesaka bawu koso-koso, kasi Mfumu me sadisa munu mpe me vulusa munu na mutindu yina samu mu lendaka tuba na suka yayi na beno.

² Mpe beto ke na kiese ti ya ke na tabernacle mosi ya mbote yina me fuluka mpe na bantu ya kutelama. Mu zolaka zola kaka ti beto kuvwanda na bakiti mingi, mpe samu na kupesa na bantu yina kele ya kutelama. Beto ke vwanda na kiese kana beto vwandaka na bawu, kasi mu banza ti bima nionso me salama. Mu zaba ti beno ke zola kwisa ve mpe kuvwanda na bana yayi na autel mpe kubalula mukongo ya beno mutindu yankaka yayi.

³ Ntangu yayi, ya me kuma mwa bilumbu fioti ti mu me vwanda na kutanga disolo, mpe mu banzaka ti mbala yankaka na suka yayi na kisika ya kulonga mu lendaka longa mwa ntangu fioti na zulu ya Ndinga ya Nzambi. Mpe bubu yayi na kutala beto lendaka luta fioti ngunga, na yina mu ke . . . bayankaka ya beno ke sobisa na bayina kele ya kutelama, to kima mosi, ya kieleka ya ke vwanda mbote kana beno lendaka—kana beno lendaka sala yawu mpe kupesa bawu mwa kupema.

⁴ Mpe ntangu yayi mingi ya bankundi, ya bankundi ya munu ke kwisaka, bayankaka na kati ya bawu ke katukaka ntama mingi, ntama kuna na Georgie, kuna na Ohio, na Tennessee, kaka na bisika ya kuswaswana, na Illinois, na Missouri, na Michigan, bawu ke katuka na Chicago, kaka samu na mwa lukutakanu mosi ya tabernacle mutindu yayi. Mu ke vutula matondo mingi samu na bantu ya mutindu yina. Mpe yina kaka ve, kasi mu ke zola kutuba yayi, ve samu na ndandu ya . . . kasi na ndandu ya Ndinga ya Nzambi: bantu yayi nionso ke kwisaka kaka ve kasi ba ke nataka mosi ya kumi ya bawu kintwadi na bawu samu na kutula yawu na yinzo-Nzambi samu na lusalusu.

⁵ Ntangu yayi, yina kele kaka bankundi ya mbote. Beno lenda kaka ve kuzimbana bantu mutindu yina.

6 Mpe na yina bantangu yankaka mu fwana tuba kima yina ke lwadisa bawu, kasi beno ke mona yina ya zola kutuba kuna. Na kati ya ntima ya beno beno zola sala yawu ve, kasi diaka ya kele na Kima yina ke tuba, “Nge . . . ya fwana salama,” beno me mona, na yina nge fwana sala yawu.

7 Mpe kumona bawu me katuka bisika nionso mpe—mpe ke meka na kusadila Mfumu, mpe ke kwikilaka na ministere yina Mfumu me pesa munu mpe ke tula kivuvu na munu na kuvwanda kisadi ya Yandi ti mu fwana ve kutuba na bawu kima ya luvunu, na yina na kieleka na ntima ya kieleka mu ke sala nionso yina mu zaba samu na ku—kutwadisa mioyo ya bantu yina; na kuzabaka ti bawu ke kwisa awa ve samu na kumonana, na kunataka ditoma na myongo ya galasi mpe biwanda, mpe ke zabuka na banzila ya kukangama, mpe bana ya bawu ke kondwa madia mpe ke lala, mpe valize ya bawu kuna na manima ya ditoma. Mpe, beno zaba, ya kele mpasi.

8 Kasi Biblia ke tubila bantu ya mutindu yina, kuna na Buku ya ba Hebreux, kapu 11, “Mpe yinza kele ve ya kulunga samu na bantu ya mutindu yina.” Mu—mu ke tuba yawu samu mu zola tuba yawu na kati ya ntima ya munu.

9 Mpe mingi kele awa na New Albany mpe Louisville, mpe pene-pene na nziunga, kuna na Kentucky, mpe bisika ya luswaswanu ntama mingi ve, kasi ba ke ya kukwikama na kukwisa, ke zabuka na kati ya galasi na ditoma, na kati ya mvula-mpembe, mpe nyonso, samu na kukwisa awa.

10 Ntangu yayi, Lumingu ke na kwiza ke tekila Nowele. Mpe mu vwandaka banza ti mu vwandaka . . . mu vwandaka na nsangu ya Nowele samu na dibuundu, kasi mu—mu vwandaka na nsatu ya mutindu mosi samu na bana yayi ya fioti, mu fwana tuba kana bawu . . . kana mu zolaka vwanda awa, na yina mwa bantu yayi zolaka vwanda, mingi na kati ya bawu ntama, zolaka kondwa Nowele mpe nionso. Na yina ya zolaka vwanda mwa mpasi samu na bana ya fioti. Kasi ntete kukwenda . . . Ntangu yayi, beto . . .

11 Mu zaba ti beto awa ke longaka ve bana ya beto disolo ya luvunu mutindu Tata ya Nowele. Beto ke kwikilaka ve na kutuba luvunu na bantu, na yina beno ke vuna ve bana ya beno. Kima ya mutindu yina, yina ke disolo ya luvunu na mvimba ya yawu, samu na kima mutindu kima yina ke baka kisika ya Klisto na Nowele.

12 Mpe Nowele me zimbisa . . . Nowele kele dyaka ve kusambila; ya kele mukembo, kunwa malafu, kusala nsaka ya mbongo, kusala feti, kaka bumpani ya kifuluka. Mpe ya kele ve . . . Mpe mu zolaka . . . Mu banza na manima ya Nowele mu ke tuba dyaka na zulu ya *Nowele*, beno me mona, na yina ya ke pekisa ve bana . . . Kasi beno lenda ve kutuba yawu na bana ya fioti mutindu yina. Ba ke mona bana ya fyoti na nkokila ya Nowele yina ke na kubaka makabu ya Nowele mpe bima mutindu yina,

ba ke bakula yawu ve. Beno me mona? Bawu ke kaka . . . bawu kele fyoti mingi. Mpe beto fwana bambuka moyo na bawu, ti bawu kele . . . ti bawu ke salaka mambu kintwadi. Beto fwana kukikulumusaba beto mosi samu na kubambuka moyo na bana yayi ya fyoti, ti bawu mosi . . .

¹³ Mu ke sala makelele mingi—mingi na zulu ya yawu, mpangi-bakala, volume kele na zulu mingi samu na yawu? Beno lenda kuwa munu mbote mingi kuna na manima, na manima kuna? Huh? Beno vingila, mu me telama pene-pene mingi. Wapi micro ke na kusala, nionso zole, yayi mpe yayi? Mu—mu banza ti ya kele yina kele mbote. Ya kele—ya kele . . . Ntangu yayi, wapi mutindu ya kele, ya kele mbote? Ntangu yayi ya kele mbote, mbote.

¹⁴ Ntangu yayi, bana ya fyoti fwana bakula. Beno zaba, ba kele—ba kele bana ya fioti, mpe beto fwana bambuka moyo ti beto vwandaka ntete bana ya fioti, mpe.

¹⁵ Mpe mu ke bambuka moyo ntangu beto vwandaka bana ya fioti, bawu vwandaka basika mpe vwandaka zenga mwa matiti ya ntama ya cèdre kisika mosi kuna, mpe mama ke panza masangu mpe ke nsokota yawu na balweka. Ya kele kaka nionso yina mu banza vwandaka na yinti. Kasi na mwa basoseti yayi, ya ntama ya bilambu ya kunamika kuna mutindu . . . Mpe, oh, mpe mu banza yandi vwandaka kuzwa . . . mu banza mwa saki mosi ya fioti ya bisikwiti, mpe babisikwiti yayi ya ngolo, (mpe zole to tatu samu na munu, mpe zole to tatu samu na Humpy, mpe zole to tatu samu na *yayi*), kaka mwa bitini ya bisikwiti, mpe beto vwandaka keba yawu kilumbu ya muvimba, na kufibaka yawu, beno zaba. Mpe ke vinga yawu na mwa kitini ya papier mpe ke tula yawu na posi ya beto. Mpe kana beto ke na mwa pistolet mosi ya ntama, to—to mwa lusibu ya kubula, yawu vwandaka kima mosi ya nene, ya vwandaka sepelisa beto.

¹⁶ Bubu yayi, ya kieleka, ya kele mutindu yankaka. Bantu ya mputu kele na mwa mbongo mpe ya kele samu bawu kusumba bima mingi samu na bana ya bawu, bawu ke lwata mbote, ke kudia mbote, bawu ke zinga mbote mingi. Mpe nionso—nionso kuna, mu banza ti bawu me kuzwa ntangu ya mbote mingi, mpe na mutindu ya lufutu ya bubu yayi. Mpe na yina, samu na bana ya fyoti, beno fwana bika bawu kuzwa kima mosi.

¹⁷ Kasi ntangu nyonso beno simba yayi, beno tuba na bawu ti ya kele ve na kima mutindu Tata ya Nowele, samu ti ya kele kieleka ve. Mosi ya bilumbu yayi bawu ke belama mpe ke tuba, “Yinki samu na Yesu, na yina?” Beno me mona? Beno me mona? Na yina beno tuba na bawu Kieleka, beno vwanda ya kusungama na muntu nionso. Beno vwanda Kieleka. Mpe, mingi-mingi, beno lendaka ve kutuba na bana ya beno kima ya luvunu, samu ti bawu ke telama mpe ke tuba . . . Bawu ke kwikila na beno mutindu Muklisto, mpe bawu zola beno . . . Ba ke kwikila ti yina beno ke tuba na bawu kele Kieleka. Na yina

beno vwanda kieleka ti beno ke tuba na bawu Kieleka, na yina nionso ke tambula mbote mingi.

¹⁸ Ntangu yayi, mpe na yina mu zola kuzwa dyaka nkokila mosi kana mu lenda, to kilumbu, na tabernacle, ntete mu kwenda na bisalu ya bamvula ke kwisa . . . mvula ya kisalu, mu zola tuba.

¹⁹ Mpe kana ya kele luzolo ya Nzambi, mu zola kumeka kuzwa balukutakanu mingi na bayinsi ya nzenza na mvula yayi, samu mu ke na nsatu ya yawu. Mingi-mingi na Suis-. . . na Suède mpe na Norvège, mpe na bayinsi mingi ya ba-Scandinave—Scandinave, mpe kuna na Asie. Mu ke na kutala ti beto fwana vwanda na kiadi na kati ya bisambu na zulu ya bima yayi, ti beto fwana longuka nzila ya Mpeve-Santu mpe mutindu Yandi ke twadisa beto, mpe bima yina beto zolaka sala.

²⁰ Na kulonguka na disolo ya ntete ya dibuundu, ya Broadbent, mpe ya Hazeltine, mpe mingi ya milabu ya bawu na zulu ya yawu, *Batata ya Nicée*. . . Mpe mazono mu me manisa na kutanga luzingu ya muvimba ya Santu Martin yina dibuundu ya Katolika mangaka na kukumisa santu; Nzambi salaka yawu. Na yina bawu. . . samu na luzingu ya yandi ya nene, mpe wapi mutindu bidimbu yina mpe mambu ya ngitukulu landaka muntu yina kuna na luzingu ya yandi; mutindu yandi vumbulaka bantu zole ya kufwa, basisaka bampeve ya yimbi, zonzaka na bandinga ya kuzabana ve, mpe monaka ba-vision mpe bima, mpe yina muntu ya nene. Kasi, ata mutindu yina, na kinsweki ya ngolo ya yandi vwandaka na kati ya kukikulumusa na ntwala ya Nzambi. Mpe beto ke mona bubu yayi ti dibuundu, kasi beto ke na kulongaka ngolo ya yawu mpe ke na kulongaka bidimbu samu na kulanda mukwikidi, kasi beto ke mona bawu na lunangu, “mu kele nene, nge kele fioti,” mpe yina, ya—ya kele ve mutindu Dibuundu ya ntete, beno me mona. Ba vwandaka ya kukikulumusa, mpe lutondo mosi na yankaka, mpe ya lembami, ya lubakusa. Mpe ya kele ya kuswaswana mingi bubu yayi. Mpe mu ke kukiyufula kana mingi ya yayi me nata beto ve na kubeba ya kieleka ya—ya Nsangu, ti, beto zola kukikulumusa beto mosi. Beno kukikeba beno mosi. . . Kulutila mingi beno lenda kukikulumusa, kulutila mingi Nzambi ke sadila beno.

²¹ Mu vwandaka longuka masolo mpe masolo nionso yayi, Nowele yawu mosi kele disolo. Ya kele ve. . . Kima ya kieleka kele ve samu na Nowele. Nowele ba me tubila yawu ve na kati ya Biblia, ba vwandaka sambila ata fioti ve kilumbu ya mbutukulu ya Klisto. Ya me vwandaka na kima ya mutindu yina ve. Ya kele dogme ya Catholique ya Rome mpe malongi ya Muklisto ve, ata Masonuku ve samu na yawu kisika mosi ve na kati ya Biblia mpe bamvula nkama na manima ya Biblia, beno me mona, kima mosi ve na yawu. Ya kele kaka disolo. Tata ya Nowele, mumbongo, nyonso, kima ya muvimba me kota na kimvuka ya nene.

²² Kana beno vutuka na manima mpe beno longuka mbandukulu ya yawu mpe beno tala na yisi ntangu yayi, beno ke mona kisika beto vwandaka. Kima mosi ve me bikana, kima mosi lenda sadisa kasi Nkwizulu ya Mfumu. Kaka yina. Ya kele na kima ve ntangu yayi yina lenda sadisa beto na kumwangisa poto-poto yayi kasi Nkwizulu ya Mfumu.

²³ Mwa buto yayi ke pekisa ba-bande yayi? Mu banza ti mu ke pekisa diambu yayi nionso, mu ke pesa muswa ve ba basisa yawu, samu ya kele kaka ngolo mingi. Kasi mu ke tuba mutindu yayi. . . Ba-bande ke na kusalama na ntangu yayi? Beno teka ba-bande yayi ve, beno me mona, ba-bande yayi kele ve samu na kuteka. Ya lendaka luta na yinzo-Nzambi, to nionso yina, kasi. . . samu ti ya kele. . . ya ke sala muvusu, kieleka mutindu yinza. Beno me mona? Na yina beno simba kaka yawu tii ntangu beto ke kubika yawu mutindu yankaka.

²⁴ Ntangu yayi, ntete beto kota na nsangu, mpe muntu nyonso ke meka na kuvwanda na kati ya kuyindula mpe ya kupema mutindu beno lenda. Mu ke baka ntangu ya yinda ve, kasi mu ke zola baka ntangu ya munu na mutindu ti. . . kunata yawu na yisi, samu beno kumona yawu ya kieleka. Ntangu yayi, ntete beto. . . Ntangu yayi, kana bima nionso kele na ngaanda ya nzila, mu ke kwikila, tii na kisika yayi ti ya ke. . .

²⁵ [Mpangi Neville me tuba ya kele na mwa bakiti ya kuvwandila—Mu.] Yinga, bika bamama yina kele ya kutelama na lweka kuna kukwisa awa. Ya kele na kisika na zulu awa samu na beno bampangi ya bakento. Yinga. Awa kele na mosi kaka awa na ntwala. Awa kele na kiti mosi na manima awa. Ya kele na bana awa na autel, kana muntu zola kutelama mpe mwana ya fyoti, mpe kupesa kiti na muntu mosi, kuluntu yina kele ya kutelama. Samu na yinki, ya kele na kisika na—na autel awa samu na bana, mpe kuluntu lendaka vwanda na kiti yango. Bamama yina me telama na manima ya dikunzi kuna. Kana beno. . . Ya ke ntama mingi awa na nsongi, kasi ya ke. . . ya ke salaka mpasi na kutelama kuna. Kana beno zola kutelema. . .

²⁶ Awa kele na bayankaka na estrade. Ntangu yayi, ndambu ya beno bampangi yina ke zola kukwisa awa, bana yayi kele na. . . Ya kele na mosi ya kuvwanda awa na lweka ya Mpangi Way. Beno kwisa ntangu yayi, beno nata bakiti ya beno kaka awa, samu ti muntu nyonso. . . beno lenda vwanda kaka na yinzo, beno ke vwanda. . . beno ke vwanda kaka na yinzo. Awa kele na kisika kaka awa, Mpangi Shelby, kaka awa na estrade, kana beno zola kwisa awa mpe kuvwanda na lweka ya beto, kaka awa. Mpe Mpangi Evans na Mpangi Charlie, mpe nge, ya kele—ya kele na kiti awa, mpe mosi kaka awa, mpe zole—zole kele awa. Kwisa kaka, mpangi-bakala kuna na. . . beno kwisa kaka, beno vwanda kaka mbote na yina beto lenda. . . beto nata bantu nionso kuvwanda swi samu—samu na kusalu, na yina beno ke vwanda ya kulemba ve mpe ya kulemba mingi mpe ya kutelama.

27 Bayankaka na kati ya beno bampangi kuna na manima. . . mpangi-kento yina kele kuna na manima na couloir, ya kutelama kuna na manima na couloir. Beno kele. . . kivinga ya pima. Ya kele na yankaka, ya kele zuni ya piano muntu mosi lendaka sadila, kana ba lendaka kwisa mpe kuvwanda na zulu ya yawu. Ya ke vwanda mbote mingi. Mu ke mona mama mosi kuna na manima ke yidika kiti mosi ya mpamba na lweka ya yandi, na yawu yina ke mbote mingi. Beno sala kaka beno mosi kuwa mbote mutindu beno lenda ntangu yayi.

28 Mpe ntangu yayi na yina beto ke na kuvwanda, beto. . . Ya ke na kutala baminuti makumi zole, ya kele baminuti makumi zole na tatu na manima ya kumi, na kilumbu yayi ya kumi na sambwadi ya Ngonda ya kumi na zole. Mvula ke na kunoka kuna na ngaanda, awa na Jeffersonville na suka yayi. Mpe—mpe beto kele na mpasi na nganda; kasi beto ke kuwa mbote na kati, kitoko, na kuzabaka ti beto ke na pusana, Nkwizulu ya Mfumu me kuma pene-pene, mpe kubelama na Kukonda nsuka. Mpe beto ke vutula matondo mingi na Nzambi ti beto ke na kiyeka na suka yayi na kutelama mpe kupesa yawu na mukwikidi, mpe muntu ya kukondwa lukwikilu, Ndinga ya Nzambi ya moyo. Mu ke tula kivuvu ti ya ke vwanda kilumbu mosi ya nene samu na beto nionso na kubakula mambu ya Mfumu.

29 Ntangu yayi beto kulumusa bayintu ya beto na mwa ntangu fioti samu na kusambila. Mpe na yina beto kele na bayintu ya beto ya kukulumusa, kana ya kele na kima beno zola ba bambukila moyo, beno telemisa kaka maboko ya beno na Nzambi, beno bambuka moyo na lombilu ya beno na kati ya ntima ya beno. Matondo na beno.

30 Tata ya beto ya Mazulu, mutindu beto kele ntangu yayi na tabernacle, beto nyonso lenda vwanda, mpe ba-micro ke na kusala, mpe ba-magnetophone ke na kusalaka, mpe Baklisto ke na kusambila, ba ke na kuzabisa balombilu. Mpe samu na basabala zole to tatu mu me longuka ntangu nionso nsangu yayi samu na bubu yayi. Kaka mwa bampova yina mu banza ti Mpeve-Santu ke sadila samu na kunata dilongi na kati ya bantima ya bantu, ti bawu lenda mona ntangu yina beto ke na kuzinga, mpe beto ke kubama samu na kukutana na Mfumu Nzambi. Beto ke sambila samu na bambevo ya beto nionso mpe bantu yina ke na mpasi bisika nionso.

31 O Yesu, bambuka moyo na Dibuundu ya Nge, Dibuundu ya yinza ya muvimba, bisika nionso na yinza na suka yayi, bayankaka kuna na kati ya bamfinda, yankaka kuna na kiwanda ya lukanu, bayankaka ya bawu kele na zulu ya mongo. Mpe na yinza ya muvimba bana ya Nge ke tala na Nge mpe ke bokila Nge. Mpe mutindu Jean ya ntama, na Kisanga ya Patmos, tubaka, “Mpe na yawu, kwiza, Mfumu Yesu.”

³² Mpe beto ke mona ti beto kele ve na mvwandulu ya mbeni, yandi kele ntangu nionso pene-pene samu na kupekisa mpe kukanga, mpe kusala nionso yina yandi lendaka sala. Kasi, O Mfumu, pesa bana ya Nge lukwikilu na suka yayi, ngolo ya kutelema na zulu ya mbeni, samu na kuzibula bantima ya bawu mpe kusala moyo ya bawu kilanga ya ntoto yina ke butaka mbuma kisika yina ba lendaka kuna Ndinga ya Luzingu, mpe kupesa kiese ya nene mpe kuyonzika ya nene.

³³ Mu ke sambila, Mfumu, ti Nge ke sakumuna Ndinga ya Nge mpe bisadi ya Nge. Pesa lusalusu na ndinga yayi ya kulemba ti mu lunga vwanda na kiyeka ya kusimba ngolo na nzila ya kupakulama ya Mpeve-Santu. Mpe na yina na ndonga ya bisambu, pesa ngolo mpe lukwikilu, Mfumu, ti ya ke vwanda ve na muntu mosi ya kulemba na kati ya beto ntangu beto ke katuka na yinzo yayi. Pesa yawu, Mfumu.

³⁴ Beto zaba ti beto ke na kuzinga na ntangu ya nsuka. Mpe beto ke lombi Nge na kusakumuna beto ntangu yayi na yina beto ke na kuingila na Nge mpe ke tanga Ndinga ya Nge. Na Nkumbu ya Yesu beto ke sambila. Amen.

³⁵ Ntangu yayi mu ke tanga bisika zole to tatu na Masonuku, mpe mutindu mu zabisaka yawu na Lumingu me luta ti bubu yayi mu ke meka na kutuba na zulu ya: *Buklisto Me Swaswana Na Kusambila Biteki*. Mpe yina kele dilongi ya beto na suka yayi. Mpe, ntangu yayi, mu kele ve muntu ya théologie, ve longoki ya Biblia na mutindu mosi, kaka muntu yina me longukaka ve yina ke zolaka Mfumu Yesu na ntima ya munu nionso. Mu ke na kutubaka ve ti mu kele muntu ya théologie to kumeka na kubaka kisika mosi, kasi kumeka kaka na kukikulumusanya ntima ya munu samu na kutendula mambu yina ti mu ke na kutala yina Mpeve-Santu me talisa munu, mpe mu fwana pesa na dibuundu ya munu. Samu ti ya me sepelisa munu samu ti dibuundu yayi me yela, ti dibuundu yayi kele kieleka na kimpeve. Ya kele samu na ndandu ya munu samu ti dibuundu yayi kele ndandu ya Nzambi, mpe kusepela ya Yandi kele kusepela ya munu. Na yina mu fwana tala na yayi.

³⁶ Mu vwandaka tanga na bantu ya ntete ya masolo, samu na Irénéé mpe bayankaka, mutindu bawu kebaka dibuundu ya bawu ntama na bima ya yimbi ya yinza, mutindu milongi yayi ya ntama telamaka kuna mpe kieleka vwandaka na Nsangu ya mbote yina. Biblia sonamaka ve na ntangu yina na mutindu beto ke na Yawu ntangu yayi, ve tii na ntangu ya Kusungika, mpe Luther tulaka yawu na buku. Kasi bawu—bawu vwandaka na yina bawu bokilaka *Nsangu ya mbote mpe Ntumwa*. *Nsangu ya mbote mpe Ntumwa*, mpe bawu vwandaka na yawu.

³⁷ Ntangu yayi, samu na bisika ya beto zole beto zola kutanga na suka yayi, mosi ya yawu kele na kati ya Buku ya Jérémie, kapu ya 7, mpe kubanda na nzila ya 10 tii na nzila ya 18. Kisika

yankaka kele na Actes 7:49. Mpe kana beno zola baka masonuku samu na yayi, to dilongi ya yayi, Jérémie 7, ya ke vwanda na nzila ya 18. Mu zola banda kutanga na nzila ya 10.

Mpe beno kwisa mpe beno telama na ntwala ya munu na yinzo yayi, yina ba ke bokilaka na nkumbu ya munu, mpe beno tuba, Beto me vuluka samu na kusala busafu yayi nionso?

Yinzo yayi, yina ba ke bokilaka na nkumbu ya munu, me kuma yinzo ya miyibi na meso ya beno? Tala, Mu me mona yawu mpe, me tuba MFUMU.

Kasi beno kwenda ntangu yayi na kisika ya munu yina vwandaka na Silo, kisika mu tulaka nkumbu ya munu na mbala ya ntete, mpe kumona yina mu salaka samu na yawu samu na bantu ya yimbi ya Israel.

Mpe ntangu yayi, samu ti beno me sala bisalu nyonso yayi, me tuba MFUMU, ti mu me zonza na beno, ke telama na suka-suka mpe ke zonza, kasi kuwaka ve; . . . Mu bokilaka nge, kasi nge pesaka mvutu ve;

Na yina mu ke sala yayi na yinzo yayi, yina ba ke bokilaka nkumbu ya munu na nkumbu ya munu, yina beno ke tula kivuvu, mpe na kisika yina Mu pesaka na beno mpe na batata ya beno, mutindu mu me sala na Silo.

. . . Mu ke basisa beno na meso ya munu, . . . Mu ke basisa bampangi ya beno nionso, Mu me tula na nganda bampangi ya beno nionso, mpe nkuna nionso ya Ephraïm.

Na yina beno futa ve samu na bantu yayi, beno sambila ve . . . samu na bantu yayi, beno telama mpe beno boka ve na bisambu samu na bawu, to kolomba samu na munu: samu mu ke kuwa beno ve.

Beno me mona nge ve yina bawu ke salaka na mbanza ya Juda mpe na babala-bala ya Jérusalem?

³⁸ Ntangu yayi mu zola telema na ntwala mu tanga nzila ya nsuka ya yayi. Beno bika mu banda diaka ntangu yayi. Nzambi ke nganina bantu yayi, mpe ke tuba, “Kusambila ve samu na bawu.” Beno bika mu banda na nzila ya 16 mpe mu tanga na nzila ya 18 ntangu yayi. Beno kuwa mbote.

Na yina kusambila ve samu na bantu yayi, kuvumbula ve bisambu samu na bawu, to kulomba ve na munu: samu ti Mu ke kuwa nge ve.

Beno me mona nge ve . . . Nge ke mona ve yina bawu ke na kusalaka na mbanza ya Juda mpe na babala-bala ya Jérusalem?

Bana ke na kulokota bankuni, . . . batata ke na kupelisa batiya, mpe bakento ke na kusala pate, samu na kusala mikati samu na kupesa na ntinu-kento ya mazulu, mpe samu na kusala kumwangisa makabu ya vinu na banzambi yankaka, samu na kupesa munu nganzi.

³⁹ Ntangu yayi, mu ke zola kubaka ntangu yayi na Buku ya Actes, kapu ya 7, mpe kubanda na nzila ya 44, mpe kutanga tii na 50.

Batata ya beto vwandaka na tabernacle ya kimbangi na ntoto ya kuyuma, mutindu ba lakisaka yandi, na kutubaka na Moise, ti yandi fwana tunga yawu na kifwanusu yina ba lakisaka yandi.

Mpe na manima batata ya beto yina bikanaka bawu nataka yawu na lutwadusu ya Josué na yinsi yina bawu bakaka na bantu ya makanda, yina Nzambi basisaka na ntuala ya batata ya beto, yawu vwandaka kuna tii na bilumbu ya David;

Yina kuzwaka lusakumunu na Nzambi, mpe lombaka yandi muswa ya kutunga yinzo samu na Nzambi ya Jacob.

Kasi Salomon tungilaka yandi yinzo.

Beto zaba mbote ti Nzambi-mpungu ke vwandaka ve na kati ya bayinzo yina bantu ke yidikaka; mutindu yawu kele ya kusonama na kati ya dibuku ya profete,

Mazulu kele kiti ya munu ya kimfumu, mpe ntoto kele kisika ya munu ya kutula makulu: wapi mutindu ya yinzo nge lenda kutungila munu? tubaka Mfumu: to wapi kisika mu lenda kupema?

⁴⁰ Ntangu yayi, beno lenda mona na nzila ya kutanga Masonuku, ti, kisika mu ke tula dibanza ya munu na suka yayi, na zulu ya “kusambila biteki,” ntete, samu na kubanda. Ya kele na mwa masonuku samu na *kusambila biteki*. Ya kele ve na babuku mingi samu na kutendula kusambila biteki, yina kele kusambila biteki, mpe diaka yinza kele ya kufuluka na yawu. Mu banza kikuma na yawu kele, kele samu ti ba me tendulaka yawu ntete ve na bantu, kukondwa kuzaba yina ya kele. Mpe mu me kuzwa ntangu ya munu ya mbote, mpe bweso ya munu ya nene na luzingu ya munu, na kusala nzietolo, samu na kumona bisambu ya biteki, samu na kuzaba yina yawu kele.

⁴¹ Mpe na yina na kulongokaka kusambila biteki, na mwa basabala me luta, masolo, masolo ya ba-Grec mpe masolo ya ba-Romain, na yina ya ke nata munu na kumona kana ba ke kufwaka . . . ba ke landila na kukeba kima mutindu mosi na luzingu, kutala kana kusambila biteki kele mutindu ya vwandaka na mbandukulu. Bubuy yayi na nzietelo, na kumonaka

kusambila ya biteki; mpe na kumonaka mutindu yawu bandaka, na kutangaka mutindu ya bandaka kuna na . . . na bilumbu ya ntete; mu ke mona ti ya me soba ve.

⁴² Ntangu yayi, mu vwandaka na Inde, Inde kele ya kifuluka na kusambila biteki. Bawu kele na bantu yina ke tambulaka na tiya kuna mpe bantu ya mutindu na mutindu . . . Mu banza, na manima ya midi yina ntangu mu kumaka na Bombay, mu me bendama na manima ya midi yina na . . . Mu kele . . . muntu mosi me tuba na munu, mu ke zolaka zaba ve nani vwandaka nani, ba vwandaka kaka na tempelo ya ba-Jaïn. Mpe ya vwandaka kumi na sambwadi to sambwadi, bansambulu ya kuswaswana, mpe mu ke ndima ti ya vwandaka na bansambulu kumi na sambwadi ya luswaswanu yina kutanaka na munu kuna na ntembe ya Ndinga, mpe mosi na mosi ya bawu ke telemina na ngolo Klisto. Bansambulu kumi na Sambwadi ya bansambulu ya kuswaswana! Mpe bawu vwandaka . . . Bawu salaka ti beto kukatula basapatu ya beto na tempelo, mpe kukota kuna, mpe bawu ntulaka beto na zulu ya ba-oreiller. Mpe ya zolaka baka mwa ntangu fioti samu na kuluta nzila yayi nionso ya mpasi (mutindu mu ke bokilaka yawu) beto fwana kuluta. Kasi mfumu ya mbanza nataka beto kuna, yandi mosi vwandaka Hindou, yina kele Musulman.

⁴³ Mpe Mahomet vwandaka profete mosi, mpe yandi basikaka na ndonga ya Ismael yina vwandaka diaka mwana ya Abraham.

⁴⁴ Mpe yawu vwandaka na ndonga ya evangeliste yayi yina me zabana mingi na yinza ya muvimba bubu yayi, ti, yina tinaka mosi ya babakala ya bawu yina tulaka ntembe na yandi na kumekama ya ngolo na kati ya Ndinga. Mpe, na dibanza ya munu, evangeliste lendaka tuba, “Mu ke na makabu ya kubeluka ya nzutu ve, kasi nzutu ya beto ya bakwikidi ke na yawu. Beno pesa munu mwa bangunga, mpe mu ke nata muntu mosi awa.” Beno me mona? Kasi, na yina, na kusalaka mutindu yina, na yina evangeliste zolaka kukitalisa yandi mosi na ba-organisation yina vwandaka simbisa yandi, mpe na yina ba zolaka losa yandi na ngaanda.

⁴⁵ Mpe na yina na dibanza ya zole ya yawu, mu ke kwikila ve ti mu lendaka bika muntu ya kukondwa lukwikilu yina na lunungu na zulu ya Ndinga ya Nzambi. Kana ba zolaka nunga munu, mu zolaka telama kaka kuna mpe ke lakisa lukwikilu ya munu mpe kundima ya munu na Nzambi ti Yandi kele kaka mutindu mosi. Mutindu bana ya ba-Hebreux tubaka, “Nzambi ya beto kele na kiyeka ya kuvulusa beto na dibulu ya tiya yayi, kasi na yina beto ke fukimina ve biteki ya beno.” Yinga, mu ke kwikila ti ya zolaka vwanda na kima mosi ya mbote mingi. Na yina diaka mu . . .

⁴⁶ Mutindu dokotolo ya théologie mpe ya kifuluka na Masonuku, mutindu evangeliste ya nene kele, mpe muntu ya ngolo yina yandi kele, mu ke kwikila ti mu ke tula ntembe

na yandi na zulu ya Ndinga, to Yesu vwandaka Klisto to ve, to kana Mahomet vwandaka profete, mpe siamisaka yandi na nzila ya Biblia ya yandi mosi. Kana yawu vwandaka lubokilu ya munu (na kati ya Biblia) mutindu yawu kele evangeliste, samu na kutendula yawu, mu zolaka baka kisika yina na kisika ya kukima ntama na yawu mpe kuvutuka na manima. Yina ke lakisa. . . Yina ke lakisa ve ngolo ya kieleka ya Muklisto yina ke telama kuna, ke zinga to ke kufwa. Nzambi kele na kiyeka ya kuvulusa. Mu ke kwikila ti mu ke bokila diboko ya yandi na zulu ya yawu.

47 Kasi bawu ke zimbana na kubanza na Bombay ntangu bantu ya kufwa meso kuna, ba-Musulman, na nkokila yina yandi kuzwaka kumona ya yandi na lukutakanu. Ba zolaka ve kutubila yawu.

48 Kasi, ata mutindu yina, na zulu ya bantu yayi, bawu kele bantu ya luvunu ve. Ba kele bantu ya kieleka, kaka ya kieleka mutindu beno mpe munu, mpe bantangu yankaka kulutila yina beto kele awa na Amerique. Bawu kele bantu ya luvunu ve. Bawu ke kwikila yawu ya kieleka mpe ke sadila yawu na nionso yina kele na kati ya bawu.

49 Bika mu pesa beno mwa kima mosi na zulu ya kusambila biteki. Mu ke zimbana nkumbu ya nzambi yina nzambi ya bantu yina ke tambulaka na tiya, kasi ya kele kiteki ya nene, ya nene. . . kima mosi ya kufwanana na kizizi ya muntu, mutindu kizizi ya camée, na makutu ya nene, ya nene mingi samu na kuwa masumu ya bawu nionso mpe nionso yina. Mpe bima ya nene ya makutu, ya nene mingi mutindu bilunga ya bawu. . . na makutu ya yandi awa, ti, mu banza vwandaka na ntalu ya ndambu ya million, mu banza; yina ba lendaka fwanikisa na ntalu mingi, ba lendaka fwanikisa yawu na ntalu ya fioti. Kasi, oh, misanga ya nene ya ntalu na kiteki yayi!

50 Mpe nganga-Nzambi ya tempelo ke nataka fermier, yandi fwana vwanda ve. . . kaka muntu ya mutindu bantu nyonso, ya fwana vwanda ve mwa muntu mosi ya nene. Yandi kele kaka muntu mutindu bantu nyonso, fermier yina zola vutula matondo na nzambi ya yandi samu na kuyonzika ya mbote. Mpe, na kusalaka yawu, yandi ke lakisa lukwikilu ya yandi na nzambi mutindu yandi ke kwizaka na tempelo mpe kele ya kusakumuna na nganga-Nzambi ya yandi.

51 Mpe na yina samu. . . samu na kukubama na kuluta na kiziba ya makala yina ke na ba-metre mingi ya mudindu mpe ba-metre mingi na munene, mpe vwandaka fula mupepe na ba-ventilateur tii kuna ya ke kuma mpembe ya tiya. Ntangu yayi, yina kele ya kubamba ve, ya kele kieleka. Yandi ke kwenda na ntwala kiteki, yandi ke funguna masumu ya yandi na nganga-Nzambi yayi, mpe ba ke mwangisa masa na zulu ya yandi; masa ya santu, mpe nionso yina, ti nganga-nzambi me sakumuna.

⁵² Mpe na yina, bambala mingi, ba ke bakaka ndoko ya nene, ndobo ya bambisi ya masa, ya nene, ya nene mingi, mu banza kati-kati ya pouce mosi ya tatu na zulu ya yiya na bunene, kubanda na nsongi tii na kitini ya manima ya ndobo. Mpe ba ke tula mwa bale ya masa na zulu ya yawu, mutindu mwa yinti ya ngidikilu ya Nowele, mpe mwa bale, mpe kufulusa yawu na maza mingi samu na kupesa yawu kilo. Mpe bawu ke baka, na kieleka, bamafunda ya bayina mpe ke kanga bawu ndoko na nsuni ya bawu, ke basisa bawu na ngaanda. Na yina ya ke kota, na kati ya nsuni ya bawu, ke benda bawu, na kuluta na kati ya mpasi samu na kusepelisa nzambi ya bawu, kiteki. Bawu kele ve bantu ya luvunu.

⁵³ Na yina, bambala mingi, ba ke bendaka ludimi ya bawu na ngaanda mpe ke na lance na nsomo na zulu ya yawu, samu na kuluta ludimi ya bawu mpe na zulu na kati ya mbombo ya bawu mpe kukanga yawu kintwadi, kubaka mwa bansinga ya kutungila mpe kutunga yinwa ya bawu kana bawu . . . yina me tuba bima ya yimbi. Mpe mpasi ya mutindu yayi!

⁵⁴ Mpe na yina ba ke vwanda pene-pene ya kiziba yayi ya nene ya tiya. Bawu ke kufwa nkombo, samu na kulembika kiteki, samu na kupesa luzingu samu na masumu ya bawu. Mpe beno fwana kunwa kuboka ntangu ba me kufwa nkombo yina. Bawu ke funguna masumu ya bawu na zulu ya yawu mpe ke kufwa nkombo, na kulosaka . . . ke baka menga mutindu kukatula masumu.

⁵⁵ Mpe na yina kana muntu yayi ke tambulaka na tiya, kana yandi vwanda na boma mpe kuluta na tiya, yandi ke nata nsoni na zulu ya yandi mosi. Kasi yandi fwana tambula mpe kutelama na kati ya makala yayi ya tiya. Mpe bantangu yankaka ba kele ya kudinda na kati ya tiya na ba-metre yiya. Mpe mu banza ba-metre yiya mu banza ba-metre yiya na mudindu mpe mu banza ba-metre makumi zole na sambwadi to makumi tatu na sambanu na yinda, mpe pene, oh, mu banza ba-metre zole to tatu na nene. Mpe ya ke pela mpembe ya tiya. Mpe yandi me lwata kima mosi ve kasi mwa kitini ya lele yina kele mutindu divunga ya kuvinga na kati-kati ya yandi. Mpe yandi ke basika kuna na yawu, ya kunamika na nionso yayi, mpe menga ke basika, mpe bandobo ya bambisi mpe bima nionso na zulu ya nzutu ya yandi, ke sala yandi mosi kuna na kati ya luzatu tii kuna mate ya mpembe ke basika na yinwa ya yandi.

⁵⁶ Yandi ke kwisa awa, ke tambula na kati ya tiya yina, mpe ke basika na simu yina yankaka, kukondwa kuyokama ata fioti, ke luta na kati ya tiya, mpe mu banza makulu ya yandi ke dinda mudindu yayi (makulu) na kati ya tiya, metre mosi to kulutila mbote mutindu yandi ke tambula, ke zambula makala yina ya tiya ya mbwaki na nzutu ya yandi, ke tambula na kati ya tiya yina mpe ke basika na simu yina yankaka kukondwa kuyokama.

Beno lendaka tala na makulu ya yandi, ata ditono to kisika ya kuyokama.

⁵⁷ Mpe na kutalaka yina, mpe mu banzaka, kana munkayulu ya kiteki ya mumpani, na menga ya nkombo, na lukwikilu na kima mutindu yina ke keba mumpani na tiya, yinki Menga ya Yesu Klisto ke sala samu na mukwikidi na Nzambi ya moyo?

⁵⁸ Ntangu yayi, kusambila biteki kele kima ya ngitukulu. Na kati ya bansungi beto kuzwaka yawu, konso ntangu yina . . . mu banza, mbandukulu ya ntangu. Ntangu yayi, ndonga ya kusambila biteki kele muntu yina me tula kiteki, me yidika kiteki, na manima yandi ke kota kuna mpe ke kubama yandi mosi samu na kisambu yayi ya nene. Ntangu yayi, yandi ke kwikila ti kiteki yayi me salama na kifwanusu ya nzambi yina yandi lenda ve . . . me monaka ata fioti ve. Yandi kele ve na mutindu mosi, na yina yandi ke kwikila ti yandi kele na kifwanusu ya kiteki yayi yina yandi ke sala samu na nzambi yayi.

⁵⁹ Ntangu yayi, beno zimbana yawu ve! “Kifwanisu” kele na kizizi ya nzambi ya masolo yina yandi ke kwikila ya kele.

⁶⁰ Na yina yandi ke kwenda na ntwala ya kiteki yayi mpe yandi ke fukimina, mpe ke kwikila ti nzambi yina kele muntu yina ke monanaka ve ke kulumukaka na kati ya kiteki yayi, mpe yandi ke kwikila ti yandi ke tuba na nzambi na nzila ya kiteki yayi, ti nzambi ke kwisa na kati ya kiteki yayi mpe me pesa yandi mvutu. Mpe mingi na kati ya beno milongi awa yina longokaka mitologi . . . Mpe banzambi yina, ba vwandaka na bitumba na mosi na yankaka, ba tubaka, mpe bima nionso, na bilumbu yina.

⁶¹ Ntangu yayi, na nzonzolo yankaka, nzambi loka yandi na kutelama yayi ya kimpeve, na kati ya kiteki yayi, mpe ke pesa mvutu na musambidi na nzila ya kiteki yayi. Mpe musambidi, na mutindu mosi ya kutungama ya sense ya émotion, ke kwikila ti kiteki ke tuba na yandi, na ntima ya yandi, mpe yandi me lemvočila masumu ya yandi mpe nionso yina, na nzila ya kiteki yayi, yina ke talisa pwelele ti yawu kele diabulu. Yawu kele diabulu yina ke salaka yawu.

⁶² Mpe ba ke salaka kaka bima ve na kintulumukina; bayankaka na kati ya bawu ke salaka yawu, kasi ya kele na mwa misambidi ya kieleka ya bima yayi. Mumbandu, mu lenda tuba na beno masolo ya mutindu bampeve ya yimbi yina na kati ya biteki yina ke salaka mambu ya mutindu na mutindu, ke sala ti menga kubasika na bima, mpe nyonso yankaka. Bawu—bawu kele—bawu kele bampeve ya yimbi!

⁶³ Mpe kana beno ke kwikilaka ve na . . . ti ya kele kieleka na dyabulu, beno ke kwikila ve ti ya kele na Nzambi. Ya kieleka, beno fwana kwikila na mutindu ya kuswaswana, mbote to yimbi. Na yina ya kele na dyabulu ya kieleka, mpe yandi kele muntu. *Dibanza* ve, yandi kele *muntu*.

64 Ntangu yayi, ya kele na malongi yina ke tubaka, “Dyabulu kele kaka dibanza ya yimbi yina beno ke kuzwaka.” Ve, ve, ya kele ve. Dyabulu kele muntu.

65 Mutindu mosi bantu ke kwikilaka ti “Mpeve-Santu kele kaka dibanza ya mbote yina beno ke kuzwaka.” Kasi beno kwikila yawu ve. Mpeve-Santu kele Muntu, Yawu kele Muntu ya Klisto na mutindu ya Mpeve.

66 Ntangu yayi, misambidi yayi ya biteki . . . Mpe beno kele na Masonuku ya beno ya kuyilama to bisika ya Masonuku ya beno. Mu—mu lenda tubila yawu na mwa ntangu fioti, Masonuku, beto lenda tanga mwa fioti. Ntangu yayi, bantinu yayi ya bisambu, ke na kubwa bawu mosi na ntwala ya kiteki, kwikila ti nzambi yina bawu ke na kukembila me talisama na kiteki yayi. Ntangu yayi, beno me bakula yawu, ti musambidi kele muntu ya luvunu ve? Yandi ke na muswa ya kima yina kele na kiteki yina, samu yawu me tubama na zulu ya yandi, yandi ke sala kima mosi; ke basisa yawu na kiteki yina, yina kele nzambi ya disolo, Yina ya kieleka ve.

67 Mpe bambala mingi diabulu ke kotaka na bima yina. Mpe diabulu ke kotaka na balukutakanu na bantangu yankaka mpe ke mekula yandi mosi mutindu Nzambi. Mu me monaka yayi na ministere ya munu.

68 Ntangu yayi, beno bambuka moyo, yayi kele kaka . . . beto ke na kulongaka kaka na suka yayi. Mpe mu ke zola dibuundu yayi, ntangu mu ke kota na ministere awa samu na kukwenda na bilanga ya kumwangisa nsangu, mu zola ti beno bikala na pasteur ya beno mpe beno bikala na Malongi yina ba me longa awa. Beno bikana na Ndinga yayi, beno bika Yawu ve! Beno kangama kaka na Ndinga ata yina ke kwisa to ke kwenda, beno bikala na Ndinga yina! Beno me mona? Ntangu yayi, mpe kaka samu ti mu me kwenda . . . Mu kele kaka mosi ya ba-pasteur awa. Mpangi Neville ke longaka kima ya mutindu mosi na munu, na yina beno kwisa kaka na yinzo-Nzambi mpe beno kuwa Ndinga.

69 Mu zaba ve kisika Yandi ke twadisa munu. Mu tubaka na kento ya munu na suka yayi na mesa, “Kima mosi salamaka na kati ya munu yina bokaka bamvula nionso yayi, mu ke mona yina yawu kele.” Ntangu yayi, mu zaba ve wapi nzila Yawu ke twadisa, kisika Yawu ke kwenda, kasi sika wapi Yandi ke twadisa munu.

70 Ntangu yayi, kusambila biteki, ya kele diaka bubu yayi. Beto ke mona . . . Mu ke mona bantu kukwiza na autel, mpe na meso ya kufwa na kutubaka milongisi ya kufwa meso, yina ke tuba, “Beni telama kaka, beno zimbana nyonso, zibula dibanza ya nge. Beni ke kuma Élie. Beni ke kuma *yayi, yina*, to *yankaka*.” Wapi luvunu! Beni ke kwizaka ve na Nzambi . . . Ya kele kuzibula moyo ya beno na mitindu nyonso ya bampeve ya yimbi kukota. Beni sala yawu ve. Beni fwana bambuka moyo

ti ya kele na diabulu, mpe yandi ke mekula Klisto mbote-mbote, na mutindu nionso.

⁷¹ Mu vwandaka tanga *Luzingu ya Santu Martin* ntama mingi ve, ti kisika mwana mosi ya bakala, kieleka yandi vwandaka tala mbote-mbote, yandi vwandaka kaka moine, mpe yandi tubaka ti Nzambi bokilaka yandi samu na kuvwanda mosi ya baprofete ya ntama, “Beno kuwa munu, mu kele mosi ya baprofete ya ntama.” Mpe lukolo . . . Martin, kieleka, zolaka ve kuwa kima ya mutindu yina. Na yawu bawu kwikilaka yawu ve samu luzingu ya mwana-bakala vwandaka fwanana na yawu ve. Na nsuka yandi tubaka, “Mu ke siamisa na nge ti ba me bokila munu profete ya ntama. Kaka ntwenya mosi,” yandi tubaka, “kasi ba me bokila munu.”

⁷² Beno me mona, “Makabu mpe balubokilu ba ke sobaka yawu ve.” Beno me mona, ba ke katula Ndinga, mpe ntangu beno ke basika na Ndinga yina beno ke kota na kima mosi.

⁷³ Mpe mwana-bakala yayi tubaka, “Na nkokila yayi, na kati-kati ya mpimpa, Nzambi ke pesa munu robe ya mpembe, kuvwanda na kati-kati ya beno nionso, samu na kutalisa ti mu kele profete ya ntama.” Na yina bawu . . . na nkokila yina bawu nionso waka, mpe vwandaka sisote, “kwisa,” mpe bantu vwandaka sala nzietolo. Mpe mwana-bakala yango kuzwaka robe ya mpembe. Ntangu nzenza kukwendaka, ba kwendaka mpe talaka robe, ya vwandaka robe ya kisina, kieleka, ya mpembe, ya kitoko mingi.

⁷⁴ Kasi, évêque ya kiboba, yandi lendaka bakula yawu ve. Ya monanaka mbote ve, samu, ya vwandaka kaka ve na Masonuku (robe ya mpembe).

⁷⁵ Mpe ntangu yandi salaka yawu, bawu tubaka, “Baka robe yayi mpe kwenda vwanda na ntuala ya Santu Martin, muntu ya Nzambi.” Mpe yandi lendaka sala yawu ve. Yandi lendaka telema ve na ntuala ya profete yina ya kieleka. Yandi lendaka telema ve; mpe bawu vwandaka tuma yandi na kusala yawu. Mpe ntangu ba bandaka na kubaka yandi, robe me zimbana mpe me kwenda kisika yankaka, bawu zabaka ve kisika ya kwendaka. Beno me mona, na yina ya ke kuma na kisika ya kumeka ngolo!

⁷⁶ Kana beno kele na wolo ya kieleka beno ke kukiyangisa ve kana ya kele mbote to ve, ya ke telama na kumekama na bisika nionso. Mpe Mpeve ya kieleka ya Nzambi ke telama na kumekama samu ti ya ke mekama na Ndinga ya Nzambi. “Na zulu ya ditadi yayi Mu ke tunga Dibuundu ya Munu.”

⁷⁷ Mu me monaka bantu kukota na luzatu, bantu ya mbote. (Ntangu yayi beno lenda mona samu na yinki mu ke zola ve ba tekisa bande yayi—yayi.) Mu me monaka bantu ya mbote, mpe ba-Pentecotiste, ba pasteur yina me bakulaka ve, bantu ke kotaka na luzatu mpe kubwa ngambu, mpe bima nionso ya mutindu yina, mpe—mpe ke sala bima, mpe na nsuka ba nataka

bawu na yinzo ya bilawu. Ya vwandaka zibula ntima ya bawu, bantu yina zaba diambu ve, mpe bampeve ya yimbi kwisaka kukota mpe bakaka kisika. Ya kele diabulu ya kieleka!

⁷⁸ Mu vwandaka tanga awa kisika mosi kwisaka na... Mu banza ya vwandaka Irénée to Martin, mosi, (mwa balongoki ya Biblia yina me zaba mbote mingi yayi kulutila munu), yandi vwandaka na yimpu ya wolo na zulu ya yintu ya yandi, na robe ya mpembe, na basapatu ya wolo ya kulengula, mpe yandi tubaka, “Mu kele Klisto, funguna Munu!” Santu yina lendaka sala yawu ve. Profete yina ya kieleka ya Nzambi telemaka kuna, yandi vingilaka. Mpe ya tubaka mbala zole to tatu na yandi, “Mu kele Klisto, funguna Munu!”

Yandi tubaka, “Klisto ya beto ke kwisa ve mutindu yina.”

⁷⁹ Ya kieleka, beno fwana zaba Ndinga! Beno bikana na Ndinga! Beno me mona, bitumba ya nene me kuma pene-pene. Ntangu yayi, beto me sala nsaka na dibuundu bamvula na bamvula, kasi ngunga me lunga ntangu yayi ti ntangu Jambres na Jannes ke telemina Moïse mutindu Biblia ke tuba ti bawu ke vwanda. Mpe yawu ke vwanda bitumba ya kimpeve, kunwana. Ya ke vwanda na bayankaka ke landila, dibuundu ya denomination ke kwenda kaka na ntwala na luyalu mpe ke landila mutindu ya ke kwenda. Kasi mu zola tuba ti mukwikidi ya kieleka ke kuma na kilanga yina ya bitumba, mpe beno fwana vwanda na luzabu ya mbote mpe kuzaba yina beno ke na kusalaka, to beno ke kuzwa mpeve ya yimbi mpe kuzaba ve. Kana yawu me swaswana na Ndinga yayi, beno kwikila yawu ve! Beno bikana na Ndinga yina!

⁸⁰ Kusambila biteki, kusambila biteki, ya kele ya ntama awa na Etats-Unis. Mpe bamvula mingi me luta, ba-Indien Pueblo, mpe kuna na Arizona, bawu vwandaka na bisambu biteki. Mpe, ya vwandaka, bawu—bawu vwandaka na nzambi-mvula. Mpe nzambi-mvula vwandaka... vwandaka baka kafulu ya potopoto, mpe bawu vwandaka sala kifwanusu ya kafulu ya potopoto. Mpe ba ke tulaka matono na zulu ya yandi mutindu yandi ke basikaka na potopoto. Mpe ba zolaka kukilosa bawu na ntwala ya kafulu yayi ya potopoto, na kukwikilaka ti ya vwandaka na nzambi-mvula yina kulumukaka na kati ya mpusu ya kafulu yayi ya potopoto. Samu bawu vwandaka kwikila ti... yandi vwandaka zinga na kati ya potopoto mpe na madidi, mpe yandi vwandaka nzambi na zulu ya yawu. Ba vwandaka... ya kele disolo, kaka lukwikilu ya kati-kati ti ya kele kieleka.

⁸¹ Ntangu yayi, mpe bawu vwandaka sambila bampeve ya yimbi na kusalaka mutindu yina. Na kusambilaka kafulu ya potopoto, na kubanzaka ti ya vwandaka nzambi-mvula, bawu nataka mpeve na zulu ya bawu, kieleka, samu bawu zibulaka bantima ya bawu na yawu. Kasi ya vwandaka mpeve ya yimbi!

⁸² Bantu mingi bubu yayi ke na kuzibulaka bantima ya bawu na kima ya yimbi! Beno ke kuzwa mpeve mbote, kasi bambala mingi yawu ke telemina Ndinga, na kutubaka, “Bilumbu ya bimangu me luta! Ya kele ve na kima mutindu *yayi to yina.*” Beno bambuka moyo, yina kele diabulu na nsi ya kubumbama ya Buklisto. Nzambi sadisa beto ntangu beto ke kota na kati ya yayi na manima ya mwa ntangu fioti, ti beno ke mona yawu, beno me mona, ti ya kele mpeve ya yimbi ke bumbama na kati ya Buklisto. Kasi ya kele ve Mpeve ya Klisto, samu ti Mpeve ya Klisto ke kwizaka na Ndinga konso ntangu. Yandi lenda manga ve Ndinga ya Yandi Mosi.

⁸³ Ntangu yayi, ntangu Buklisto kwizaka na Rome, Rome, na kati ya mbanza ya Rome, ya vwandaka na batempelo bankama yiya ya mimpani na kati ya kibaka ya ba-kilometre kumi na mosi. Batempelo bankama yiya ya mimpani, mpe ya vwandaka samu na banzambi mpe samu na banzambi ya bakento. *Banzambi mpe banzambi ya bakento*, “bakento mpe babakala.” Banzambi, bankama yiya ya luswaswanu. Beno banza na yawu, bankama yiya!

⁸⁴ Ntangu yayi, ya kele yina Paul monaka ntangu yandi kwisaka na Rome. Ya kele yina Aquilas mpe Priscille kuzwaka ntangu ba fidisaka bawu ntama na Pantekote mpe tulaka dibuundu na Rome; ya kele kuna ba me katuka, kusambila ya mimpani ya biteki. Ya vwandaka na bantu pene-pene ya mafuku zole na Rome, na Rome ya mbanza kimfumu; ya kele, bampika, mpe bantu ya banziunga kuna na ngaanda, mpe nionso yina, pene-pene ya mafuku zole ya bantu. Kasi bibaka pene-pene ya Rome vwandaka na ba miles sambwadi. Mpe na kati ya ba-kilometre kumi na mosi, kaka na nsi ya mongo, ya vwandaka na batempelo bankama yiya ya mimpani, samu na banzambi ya mimpani mpe banzambi ya bakento.

⁸⁵ Ntangu yayi, mu ke zola tuba awa na mwa ntangu fioti na zulu ya kima yina mu bakaka na masolo, mpe mu kele na mosi awa na munu. Mutindu bawu kotaka na bisambu, wapi mutindu bawu kwisaka samu na kukembila? Wapi mutindu mumpani kwisaka samu na kukembila? Kima ya ntete yandi salaka vwandaka kukwenda na tempelo mpe kumona nganga-Nzambi, nganga-Nzambi ya mumpani. Na yina yandi ke pesa yandi dikabu ya mbongo mingi, mpe na manima munkayulu mosi, niama mosi, samu na kulembika nzambi yina yandi vwandaka kutuba.

⁸⁶ Mpe na bantangu yankaka, na kati ya tempelo mosi, ya ke vwanda na nzambi ya mutindu yankaka. Ya ke vwanda “banzambi, banzambi ya bakento,” mpe nyonso yankaka, na kati ya tempelo mosi.

⁸⁷ Na yina nganga-Nzambi ya mumpani. . . Yandi ke kwenda na yandi mpe ke pesa yandi mwa mbongo, mpe nganga-Nzambi

ya mumpani ke pesa yandi bougie mosi, kaka bougie ya suif ya mumesanu. Na yina musambidi ke baka bougie yayi, na manima yandi me futa nganga-Nzambi, bakaka bougie yayi mpe kwendaka na autel yina ya nzambi yina yandi zolaka tuba. Mpe na autel yayi vwandaka tiya, kisika ba ke yoka munkayulu. Na makulu ya kiteki, tempelo ya nene ya bronze, to—to kiteki, mpe yandi bakaka temp- . . . bougie yayi mpe ke pelisa yawu na tiya ya autel, tiya ya autel ya kiteki, yandi ke pelisa bougie mpe ke kwenda na makulu ya autel na ntwala ya kiteki, mpe ke tulula bougie yayi. Mpe na yina na manima yandi tulaka bougie. . .

⁸⁸ Mu banza ti ya ke nzambi mosi na kati-kati ya banzambi nionso yankaka ke zaba kaka wapi na kati ya biteki yandi zolaka kubaka, beno zaba, kuvutuka mpe kutuba na yandi. Kasi bougie, mu zaba ve. Kasi yandi vwandaka tula bougie kuna, ya vwandaka pelisa batiya na autel.

⁸⁹ Mpe na yina yandi ke kulumuka kuna na tabernacle, mpe kuna yandi ke fukama yandi mosi kuna na nsi. Mpe kuna yandi ke tula moyo ya yandi nionso, ngolo ya yandi nionso na bisambu ya yandi, mpe ke sambila nzambi samu na diambu mosi, lukwikilu ya kati-kati, nzambi ya masolo, ke sambila nzambi yayi na kukulumuka na kifwani yayi mpe kutuba na yandi.

⁹⁰ Ya tubaka ti “Mosi ya ba-empereur lendaka fukama yandi mosi na ntwala ya kifwanusu ya Apollos ti yandi lendaka tuba kaka ti yandi kuwaka bandinga ke kwisa na kati ya temp- . . . na kati—na kati ya kiteki, ke tuba na yandi.” Yandi ke fukimina!

⁹¹ Beno lunga tuba na kisika yayi, “Mpangi Branham, yandi kuwaka ndinga?” Mu ke sala ntembe ve kasi yina yandi salaka, kasi yawu vwandaka ndinga ya diabulu. Ya vwandaka ve na kima mutindu Jupiter, nzambi, mpe banzambi nyonso yankaka yina bawu kuzwaka.

⁹² Kasi bawu vwandaka fukimina, mpe bawu vwandaka kuna mpe vwandaka sambila, ba sambilaka nzambi yayi ya mansweki yina bawu zabilaka kima mosi ve, na ntangu mpeve ya yandi vwandaka na kati ya kiteki yina bawu banzaka ti yandi me fwanana. Ba salaka yandi kifwanusu mosi samu na yandi, mpe yina kuzwaka lemvo na yandi.

⁹³ Na yina bawu salaka dikabu. Na yina ntangu yandi dasukaka na kati ya emotion yayi, yandi ke mata diaka na ntwala ya kiteki mpe na ntangu yayi nganga-nzambi ya mumpani ke natila yandi mwa—mwa madia mpe malafu, mpe ke tula yawu na makulu ya kiteki. Mpe na yina . . . (Ntangu yayi, mu kele . . . ya kusonika yawu awa na zulu ya paze yayi, mu ke na kutangaka yawu kaka. Beno me mona?) Mpe yandi ke kwenda kufukama na makulu ya kiteki yayi, mpe ke baka ndambu ya dikabu yayi ya malafu mpe ke kunwa yawu, mpe ke baka mwa ndambu ya madia, mpe na yina ya ke tiamuna yawu na zulu ya makulu ya kiteki.

⁹⁴ Yinki yandi vwandaka sala? Ya vwandaka bundana na bampeve ya yimbi; na kubundanaka na bampeve ya yimbi, banzambi mpe banzambi ya bakento. Kaka mutindu kifwanusu ya Muklisto ke bundana na Klisto, ke na kudyaka mbundana. Yina vwandaka mutindu dibuundu ya ntete to bizyeti ya ntete ya Nsangu ya mbote (yina kwizaka na Rome) talaka, ya vwandaka na kati ya bantu yayi na mutindu yayi ya kusambila.

⁹⁵ Baal vwandaka nzambi yina zabanaka mingi na nsungi nionso, ya biteki, ya vwandaka Baal (B, ba-a zole, l), yandi vwandaka nzambi-mwini. Mpe na yina yandi vwandaka na kento, nzambi-ngonda, nzambi ya kento, Ishtar, I-s-h-t-a-r, Ishtar. Mpe ba ke tangaka yawu diaka, A-s-t-a-r-t-é, “Astarté.” Ya kele na zulu ya mbongo ya Rome. Ba vwandaka bokila yandi nzambi ya kento, nzambi ngonda ya kento, to “ntinu-kento ya mazulu, mama ya banzambi,” nzambi-ngonda. Mpe nzambi-mwini vwandaka Baalam.

⁹⁶ Mbote, na kutala mimpani nionso vwandaka sambila mwini. Ata mpe ba-Indien vwandaka sala mutindu mosi na ntangu—ntangu beto kwisaka, ba monaka Amerique awa, na ntangu Amerique bandaka. Kwisaka, batata kwisaka awa, bawu monaka ti bawu vwandaka sambila kaka mwini. Samu, na yayi, bawu vwandaka sambila.

⁹⁷ Ya kele mutindu yina ba vwandaka sambila banzambi mpe banzambi ya bakento na Rome, ntangu Muklisto kwizaka na Rome.

⁹⁸ Ntangu yayi, na nzietelo ya munu, mu me mona ti bisambu ya biteki me soba ve. Mpe Buklisto ya kieleka me soba ve. Bawu zole kele na bisika ya bawu, mpe ke bikana mutindu yina tii na Nkwizulu ya Mfumu Yesu. Na zulu ya yayi zola tuba kaka mwa fyoti, samu beno kuzwa dibanza ya yawu, mpe kana beno kele ya kimpeve ya kieleka beno ke simba yawu.

⁹⁹ Samu ti Baal vwandaka nzambi-mwini, mbote, mikati yina ba vwandaka kusala. . . Mpe Jérémie tubaka awa, beto me zonzila na mwa ntangu fyoti me luta, bakento vwandaka kusala mikati samu na Baal, nzambi-mwini. Samu, beno ke mona yawu fioti na ntwala, ti kuna na kapu, kana beno tanga yawu, ti bawu tubaka, “Kana beto sambila ve Baal na yina bimenina ya beto ke kubwa, samu Baal vwandaka nzambi yina vwandaka basisa bambuma.” Na nzonzolo yankaka, “Beto zaba ti mwini ke salaka ti bambuma kuyela.”

¹⁰⁰ Kasi profete tubaka na bawu, “Ya ke samu beno me yambula Nzambi, ya ke samu na yina bambuma ya beno ya bilanga ke kuyela ve.”

¹⁰¹ Kasi ba vwandaka sambila Baal, ba vwandaka tuba ti ba vwandaka “Kusambila, kupesa yandi makabu.”

¹⁰² Ntangu yayi, kana Baaal kele nzambi ya ronde. . . (Ntangu yayi, beno simba yayi, mpova na mpova, mpe beno ke baka

yina me bikana, nsuka ya Nsangu yayi.) . . . nzambi vwandaka nzambi ya ronde, nzambi-mwini, bawu vwandaka na ba-plaque ya nene ya laiton yina vwanda lakisa mwini mpe vwanda talana mutindu tiya. Mpe kuna dimpa yina Jérémie tubaka awa ti bawu. . . bakento vwandaka sala mikati yayi samu na Baal, ti ba vwandaka sala yawu ronde mutindu mwini. Mbote, na yina, ba vwanda tulaka yawu na autel, autel ya mimpani, samu na mbundana, mpe ba salaka yawu ya ronde mutindu mwini to mutindu ngonda, samu ya vwandaka nzambi-mwini to nzambi-ngonda.

¹⁰³ Baalam vwandaka, yina beto tubaka, “Kele nzambi ya bambuma nionso, yandi ke salaka ti bima nionso kuyela.”

¹⁰⁴ Ntangu yayi, dibuundu ya ntete kwisaka kutana na yayi ntangu bawu kwisaka na Rome. Mpe ya me tubama mpe kwikilaka na dibuundu ya Rome, to na dibuundu bubu yayi, to dibuundu ya Catholique ya Rome, yina ba ke bokila “Catholique. . .”

¹⁰⁵ Beto nionso kele bantu ya *catholique*. Beto kele Dibuundu ya catholique, beto kele catholique ya bantumwa. *Catholique* zola tuba “ya bantu nionso.” Mpe beto kele Dibuundu ya bantu nionso ya Lukwikilu ya bantumwa. Yinga, tata. Ya kele na luswaswanu na kati-kati ya mabuundu zole; mosi ya bawu vwandaka catholique, ya bantu nionso, ya *bantumwa*; yankaka vwandaka Catholique ya *Rome*.

¹⁰⁶ Mpe ya vwandaka ya kutuba ti Pierre. . . to bawu vwandaka kwikila yawu, ti Pierre tulaka dibuundu ya Rome. Mu zola Masonuku, mu zola kisika yina beno lenda tuba ti Pierre vwandaka ntete na Rome na mutindu nyonso. Mutindu dibuundu ya Rome tubaka, “Yandi vwandaka kuna kubanda na 41 tii na 46.”

¹⁰⁷ Mpe, na ntangu yina mosi, Claude vwandaka mfumu ya Rome, yina salaka ti ba-Juif nionso kukwenda. Beno tanga Actes, kapu ya 18, mpe beno ke mona ti Paul, ntangu yandi kwendaka na Ephèse, yandi monaka Aquilas mpe Priscille, yina vwandaka kieleka ba-Juif, mpe bayina ba nataka na ntangu ya lukwamusu, mpe ba vwandaka awa na Palestine diaka samu Claude tumaka ba-Juif nionso na kukwenda, Baklisto mpe ba-orthodoxe. Aquillas mpe Priscille tulaka dibuundu na Rome, mpe ba zolaka kwenda samu na kumata ya Claude, ba nataka dibuundu ya muvimba. . . to Baklisto mpe ba-Juif nionso na ngaanda ya Rome.

¹⁰⁸ Ntangu yayi, “Pierre vwandaka évêque ya dibuundu,” mpe mu lenda talisa na beno Masonuku, tii pene ya bamvula makumi sambwadi, ti Pierre vwandaka ata fioti ve na ngaanda ya Palestine. Kaka na Masonuku! Mpe beno ke tuba ti “Bawu kufwaka Pierre na Rome, mpe Paul ba zengaka yandi yintu na Rome.” Yina kele dogme. Mu me tangaka masolo nionso ya

bambangi mu lendaka kuzwa, mpe ya kele ve na mosi ya bawu yina ke samuna kima mosi samu na Pierre to Paul (to mosi) yina ba kufwaka na Rome. Masolo ya bambangi ya kulutila ntama yina beto lenda kutanga, yina kele ve na mosi na kati ya yawu yina ke tubaka kima mosi samu na yawu. Yandi vwandaka ve! Ya kele dogme.

¹⁰⁹ Mu kele awa samu na kulakisa bumpani, na yina beto ke—beto ke sala yawu na lusalusu ya Mfumu mpe Ndinga ya Yandi, beno me mona, kulakisa kaka na beno mutindu dibuundu kele. Beno ke na kuboka samu na “Catholique!” kasi beno vingila kaka mwa ntangu fioti.

¹¹⁰ Ntangu yayi, ntangu yayi, beto me mona ti na manima Aquilas mpe Priscille (landila Masonuku) ba nataka bawu na ngaanda ya Rome, mwa dibuundu kwendaka mutindu mwana ya nsona, nionso yina vwandaka kuna vwandaka mimpani yina ndimaka yina kwisaka kuna na dibuundu ya Baklisto ya Rome, dibuundu ya ntete yina Aquillas mpe Priscille mpe bankwelani yankaka yina tulaka dibuundu yayi mpe vwandaka kudisa yawu.

¹¹¹ Na yina beto ke mona ti, na ntangu bawu kwendaka, ti bawu salaka ba-évêque ya bawu mosi mpe bakaka malongi ya bawu mosi, mpe na manima bawu ndimaka. . . samu na kuzwa luve ya empereur, Constantin mpe bayina kwisaka na ntwala, samu na kuzwa lemvo, samu ti bawu zolaka kuzwa bamambeke na kati kuna samu na kusimbisa muyibi ya politiki ya yinsi. Ba kotisaka bamambeke na dibuundu, mpe ba kotisaka bawu na (“na mutindu ya kulunga”) kaka funguna, na kuzabaka ve mingi na yina me tala Nzambi kulutila bantu yayi beto kele na yawu na Amerika bubu yayi ke na kusalaka; kaka mutindu kisalu mosi, yina vwandaka kima ya nene ya kudia samu na bawu na kutubila Klisto, Nzambi yankaka na kisika ya nzambi ya bawu mosi. Mpe kuna ba ndimaka yawu, na kati ya musiku ya ngudi ya dibuundu ya bawu, mikembo ya mimpani.

¹¹² Ntangu yayi, nganga-Nzambi ya Rome, kuna bawu ndimaka yayi na kubakaka mpe na kusalaka mbundana. Kima ya ntete kwizaka vwandaka kusala mbundana. Na kisika ya basinga mutindu Nzutu ya Klisto, ba ke sala yawu *ronde* mutindu mwini to mutindu ngonda. Mpe samu na bubu yayi ya kele kaka ronde! Ya kieleka. Ya kele kaka galette ronde, mpe kitini ya kubukana ve ya Nzutu ya Yandi. Yawu kele ronde mpe ya kulengula. Banganga-Nzambi ya Rome bubu yayi ke na kutula galette yayi ya ronde na autel mpe ke bokila yawu “Nzutu ya kieleka ya Klisto.”

¹¹³ Ntangu yayi, ya kele na luswaswanu ya nene kati-kati ya ba-Pisekopo yayi ya nene, mpe nionso yina. Mpe dibuundu ya Katolika kele na zulu ya dilongi yina, kana ti ya kele Nzutu ya *kieleka* to ya ke *lakisa* Nzutu. Catholique ya Rome ke tuba “ya

kele Nzutu ya kieleka,” samu ti ya vwandaka nzutu ya kieleka ya Baal (nzambi-mwini) yina vwandaka talisa yandi mosi na zulu ya kitini yina ya kisengo mpe bawu vwandaka sala yawu ronde. Mesa mosi ve ya Baklisto kele na dimpa na zulu ya yawu!

¹¹⁴ Na yina bawu zolaka kutana na este, mpe nionso yina, mutindu bawu salaka na kusambila ya mimpani; Mpe kunata bakento, mpe nionso yina, kaka mutindu bawu vwandaka sala ntangu nionso, mutindu mimpani samu na nzambi ya kento, mpe nionso yina. Ntangu yayi ba me baka Astarté mpe me tula Marie, me kumisa yandi ntinu ya kento ya mazulu. Bawu katulaka Jupiter mpe tulaka Pierre. Mpe ba zolaka baka dogme, samu na kusala yina ba kuzwaka. . . .

¹¹⁵ Ntangu Aquilas mpe Priscille, vutukaka, na manima ya bamvula kumi na tatu ya kimfumu ya Claude, na yina ntangu bawu vutukaka bawu monaka ti dibuundu ya bawu ya muvimba kotaka na kusambila biteki, kasi me kula mutindu mammouth, kima ya nene.

¹¹⁶ Samu na kukotisa yayi, kieleka ba fwana kaka kukatula Biblia. Ntangu yayi, mu kele Irlandais, mu kele na yina ba ke bokilaka *Mambu Ya Kieleka Ya Lukwikilu Ya Beto* yina kele kaka ya nganga-Nzambi, mpe nyonso yina. Mpe mu zaba yayi, na masolo na banganga-Nzambi, nganga-Nzambi ke tuba ve na beno Biblia, Biblia kele kaka buku yankaka samu na yandi. Ntangu Evêque yayi Sheen awa tubaka, awa pene ya bamvula zole me luta, ti “Muntu nyonso yina mekaka na kukwikila Biblia, vwandaka mutindu muntu yina ke tambula na kati ya potopoto.” Bawu ke kwikilaka Yawu ve! Bawu bandaka kuna mpe bawu tubaka, “Nzambi kele na kati ya dibuundu ya Yandi, na Ndinga ya Yandi ve.”

¹¹⁷ Nganga-Nzambi yayi na zulu awa na nzila, yina kwizaka samu na disolo ntama mingi ve, awa na Sacré Coeur, yandi tubaka na munu . . . to dibuundu yayi na nzila, mu me zimbana yina yawu kele. Mu banza ti ya kele Sacré Coeur. Yandi kwisaka na munu samu na mbotika, Marie Elisabeth Frazier yina vutukaka na manima mpe kumaka muntu ya Catholique. Yandi tubaka, “Nge me botika yandi?”

Mu tubaka, “Yinga.”

Yandi tubaka, “Wapi mutindu nge botikaka yandi?”

Mu tubaka, “Na mbotika ya Baklisto.”

Yandi tubaka, “Wapi mutindu nge zola tuba?”

Mu tubaka, “Ya kele kaka na mbotika mosi ya Baklisto.”

Yandi tubaka, “Yinki nge zola tuba, na kubotikaka na kati ya masa?”

Mu tubaka, “Yinga, tata.”

118 Yandi tubaka, “Nge kotisaka yandi na masa na nkumbu ya ‘Tata, Mwana, mpe Mpeve-Santu?’”

119 Mu tubaka, “Yina ke mbotika ya Baklisto ve.” Mu tubaka, “Mbotika ya Muklisto kele na Nkumbu ya Mfumu Yesu Klisto.”

120 Yandi tulaka yawu na yisi. Yandi tubaka, “Nge ke sala nsilulu yayi, diaka, to nsamunu yayi na évêque?”

121 Mu tubaka, “Kana yandi lenda kwikila ve ndinga ya munu, yandi sala kima ve na yawu.” Mu tubaka, “Mu ke sila na nzila ya kima mosi ve.” Beno me mona? Mpe yandi tubaka. . . Mpe mu tubaka, “Kuvwanda ve na lunangu, tata, kasi mu zaba ti Biblia ke tuba, ‘Beno zenga ndefi ve na mazulu to na ntoto, samu ti ya kele kiniatinu ya Yandi,’ mpe nyonso yina. Beto fwana sala yawu ve.”

122 Yandi tubaka, “Ya kele ngitukulu, dibuundu ya Katolika vwanda botikaka mutindu yina.”

Mu tubaka, “Na wapi ntangu? Na wapi ntangu?” Beno me mona? Kasi bawu ke tuba ti bawu salaka yawu.

123 Samu, ya kieleka, ba vwandaka, mpe beto nionso vwandaka mosi na mbandukulu, mpe ya . . . mbandukulu—mbandukulu kwisaka na Pentecote. Yina kele mbandukulu ya dibuundu ya ntete bisika nionso, muntu nyonso lenda zonzila yawu. Dibuundu ya Muklisto me banda na Pentecote, na zingulu ya pentecote, bantu ya pentecote, mbotika ya pentecote. Nionso me basika na dibuundu ya ntete na Pentecote.

124 Ntangu yayi, beno tala. Ntangu yayi, beto ke mona ti bawu me kwenda ntama na malongi ya Biblia samu na kubaka bima yayi samu na kusepelisa ba-empereur mpe nionso yina, samu na kukotisa mimpani.

125 Ntangu yayi, beno tala. Pierre vwandaka Juif. Ya kieleka? Beno lenda banza na Santu Pierre ke ndima dibanza ya kutula biteki na kati ya yinzo-Nzambi, Juif yina vwandaka na kimpwanza ya kutala na kiteki? Beno lunga banza yandi kusala kima ya mutindu yina? Pierre ve! Beno lenda banza ti yandi tubaka, “Bisono ya munu nyonso kuna na mbandukulu vwandaka ya luvunu, mu ke losa yawu kaka na ntangu yayi. Mu ke zinga mutindu mpeve na kati ya dibuundu yayi ya Rome, mpe mu ke ndima. . .”?

126 Mbote, yawu lenda vwanda muntu yina me soba. Na yina, samu na kusala yawu, ba zolaka banda na dogme ti “Ba zikaka Pierre na dibuundu mpe bikaka Misiku nionso na yawu, mpe bawu vwandaka dibuundu ya Catholique ya kieleka.” Bawu kele ve! Ya kele na Masonuku ve, ya kele na ata disolo to kima ve samu na kusiamisa yawu; kima ve. Ba me vwandaka ve.

127 Mpe nganga-Nzambi ya mimpani ya dibuundu ya ntete ya Rome kele kieleka mutindu mosi bubu yayi. Bawu ke kwikila ti dimpa kele nzutu ya Klisto, ti na mutindu ti Klisto ke kulumuka

mpe ke kota na kitini ya dimpa yina na zulu ya autel (ti bampuku ke vukana na mpimpa). Beno me mona? Ke kwikila . . . Mpe ya kele samu na yina bantu ya Katolika ke kwikilaka ti beno fwana kwenda na dibuundu samu na kusambila, samu “Nzambi kele na kati ya dibuundu yina.” Kikuma yawu yina bawu ke kulumusaka yintu mpe ke fukiminaka, pene-pene ya yinzo-Nzambi, samu “Ti kitini ya dimpa kele Nzambi.” Ya ke kima yankaka ve kasi kifwanusu ya Baalam nzambi-mwini, ya ke na Masonuku ve samu na yawu ata fioti! Yinga, galette yina ya ronde kele na zulu ya autel.

¹²⁸ Ntangu yayi, na yina, bawu vwandaka ndima ve malongi ya Buklisto yina . . . Irénée, Polycarpe, mpe bampangi yina ya ntete, Paul. Beto me mona, kilandi ya kulutila ntama vwandaka . . . zingaka kulutila mingi, vwandaka Jean. Ba nataka yandi bamvula tatu, kuna na Patmos, samu ti yandi vwandaka na lukolo. Yandi vwandaka pesa to vwandaka kukubika Ndinga ya Nzambi, vwandaka vukisa Yawu kintwadi, vwandaka tula Mikanda kintwadi. Bawu monaka yandi mpe bantu ya yandi ya ndwenga kusala yawu, mpe bawu tulaka yandi na nganda bamvula tatu (na manima ya lufwa ya empereur ba vutulaka yandi), mpe kuna yandi sonikaka Buku ya Apocalypse.

¹²⁹ Mpe beno zonzila “Nzambi na kati ya dibuundu ya Yandi to Nzambi na kati ya Ndinga ya Yandi?” Biblia ke tuba ti Ndinga kele Nzambi.

Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.

Mpe Ndinga kumaka muntu, mpe zingaka na kati ya beto, . . .

¹³⁰ Diaka, . . . malongi ya konso dibuundu yawu vwanda Baptiste, Presbyterien, Methodiste, Pentecotiste, to nionso yina ya lendaka vwanda, yina kele ve kisono na kisono na Biblia yayi, kele luvunu! Samu ti Jean tubaka na Kisanga ya Patmos, Mpeve-Santu, to Klisto tubaka na yandi, tubaka yayi, “Kana muntu mosi kukatula kima mosi na Yayi to kubwela kima mosi na Yawu . . .” Na yina wapi mutindu beno ke bwela kusambila biteki yayi ya mimpani, ke sala banzambi tatu kati na Mosi, mpe bima yankaka yayi ya mimpani yina dibuundu ya ntete me longaka yawu ata fioti ve mpe me telemina yawu ata fioti ve?

¹³¹ Lukutakanu ya Nicée, kana Yandi vwandaka bima tatu to kima mosi, kuswana ya nene, bambangi ya bawu kwisaka kuna, bayankaka na kati ya bawu na—na . . . Muntu mosi, évêque, milongi ya pentecote, samu na kutentika maboko na zulu ya bambevo, bawu ke tula nkawa ya tiya na maboko ya yandi mpe ke benda maboko ya yandi na manima mutindu *yayi*. Bayankaka, ke telama, kuna ba ke baka mbele mpe ke tobula meso ya yandi, ba monanaka mutindu nkonga ya bambangi yina telemaka samu na Ndinga yayi! Alleluia! Ba vukisaka menga ya

bawu na baprofete ya ntama. Ndinga yayi, mpangi-bakala, Yawu kele Ndinga ya Nzambi.

¹³² Ntangu mimpani yayi balulaka ntima, bawu kotisaka bidimbu yayi na Buklisto. Ba lenda dyaka ve kusadila Biblia, samu ti Biblia ke lakisa yayi. Mpe ba ke tuba na beno bubu yayi ti bawu kele ve . . . bawu ke kwikilaka Yawu ve. Bawu ke tuba, “Ya kele nyonso ya kulunga, kasi dibuundu kele Ndinga ya nene.”

¹³³ Mbote, beto ke mona kima ya mutindu mosi na Pentecote. Beno nganina ve “Katolika,” ntangu beto kele kaka ya kubwa, Methodiste, Baptiste, mpe mosi na mosi ya bawu.

¹³⁴ Beno ba-Methodiste, beno kele ya santu mingi, samu na yinki beno me kufwa Joseph Smith kuna? Yayi kele Amerika mpe kele na muswa samu na kusambila. Mu ke kwikila ve yina Joseph Smith tubaka, kasi beno vwandaka ve na muswa ya kufwa yandi, kieleka, Mormon.

¹³⁵ Beno ba-Baptiste, bantu yikwa beno me kuzika? Bayankaka ya beno?

¹³⁶ Mpe Pentecote, kele kaka ya kubwa mutindu bayankaka, me kuma simisi ya kuvimba mpe nkonga ya luvunu. Mpe na kisika ya kukikulumusya mpe ngolo ya Mpeve, beno kele na Ndinga kukondwa Mpeve. Mpe beno ke sala yimbi mingi kulutila beno zolaka kana beno vwandaka mutindu bayankaka. Kuna na mikembo ya bawu ya mimpani na mitindu nyonso ya mabanza ya butatu, mpe bima nyonso yankaka yayi, beno lenda lakisa yawu ve na nzila ya Ndinga. Ndinga kele ya kuswaswana na yawu. Kyadi, mawa!

¹³⁷ Na yina ntangu ba salaka dibuundu ya ntete ya Rome, Buklisto, ba zolaka kukatula Biblia; mpe kubaka mikembo yayi, samu na kusala yawu, ba zolaka vwanda na mwa lufulu, na yina bawu tubaka, “Pierre vwandaka pape ya ntete ya Rome. Mpe yandi kele kaka mutindu yina,” bawu ke tubaka. Mbote, beto tuba ti yandi vwandaka, Pierre vutukaka kuna na Bandinga ya Pentecote? Beno lenda banza Juif mosi ke sala biteki?

¹³⁸ Mpe ntangu mu lenda lakisa beno na nzila ya Ndinga ya kusonama ya Biblia, kieleka bilumbu mpe bamvula, ti Pierre katukaka ata fioti ve Palestine kasi na ntangu mosi (mpe kwendaka na Babylone na nzila ya Euphrate), ata fioti ve ti ya vwandaka na Rome, na nzila ya Masonuku, MUTINDU ME TUBA MFUMU! Ya kele dibanza nyonso ya mimpani.

Ntangu yayi beto ke nata yawu mbala mosi na malongi ya ba-Protestant.

¹³⁹ Beno tala Pentecote, kukondwa kubaka Ndinga. Beno vwanda na Ndinga yina mpe beno ke vwanda kaka ya kusungama; beno katula Ndinga yina, beno ke kwenda bisika nyonso.

140 Awa ntama mingi ve na lukutakanu mosi ya nene ya lukolo ya Pentecote, kento mosi telamaka, yandi vwandaka tuba na bandinga, mpe yandi telemisaka lubokilu ya autel. Mpe na mpimpa yina ntangu mu vutukaka, Billy kukutanaka na munu kuna, yandi tubaka, “Nge zaba yinki? Kento yina tubaka ti yandi me kuzwa nsangu yankaka na nkokila yayi yandi ke pesa.”

141 Mpe mu talaka kento yina (bansuki ya kuzenga, robe ya kukangama mingi na nzutu mutindu ti yandi vwandaka me tiamunaka yawu na kati, kutelama kuna na kuyidika bansuki ya yandi, ke benda banama ya yandi ya nsi), mu zabaka ti yandi zolaka dumuka. Mpe yandi telemaka, mpe mu tubaka, “Vwanda.” Yandi landilaka kaka na kutuba. Mu tubaka, “Nge me kuwa munu? Vwanda!” Oh, la la.

142 Ntangu mu kwendaka na nkokila yina, ya vwandaka bantu yiya to tanu yina kutanaka na munu kuna na yandi, tubaka, “Nge me niongisa Mpeve.”

143 Mu tubaka, “Konso mpeve yina mu ke niongisa na Ndinga ya Nzambi ba fwana niongisa yawu.” Mu tubaka, “Biblia ke tuba ve ti mpeve ya baprofete kele ya kutumama na profete? Kana yandi ke na kupesa kimbangi, ti profesi kele—kele. . . Kuzonza na bandinga kele profesi kana ba me tendula yawu.” Mu tubaka, “Na yina bika yandi kuvingila tii kuna mu ke manisa, na manima yandi lenda sala yawu.”

Yandi tubaka, “Kasi nge ke na kulongaka Ndinga.”

Mu tubaka, “Yawu yina mu ke simbisa.”

144 Yandi tubaka, “Yandi vwandaka na kima ya lembami mpe ya malu-malu yina me katuka na Zulu, kima ya kuswaswana na Yawu.” Kana ya ke vutuka ve na malongi ya Catholique ya Rome mu zaba ve yina yawu kele!

145 Bika ti konso ndinga ya muntu kuvwanda luvunu mpe konso mpeve kuvwanda luvunu, mpe Ndinga ya Nzambi kuvwanda Kieleka. Ndinga ya Nzambi ntete!

146 Yinki diambu bubu yayi, ba ke na baluzayikisu mingi mpe bima ya luvunu. Ya ke na kufukama bawu mosi kuna mpe ke na kuzibulaka bantima ya bawu na bampeve ya yimbi, na kisika ya kuvwanda na Ndinga ya Nzambi. Kele kisika yina kele mpasi, yawu yina kele diambu. Bantu, bantu ya kieleka, bantu ya kusungama, bantu ya mbote, kasi beno lenda tuba na bawu ve. “Mbote, beto ke kwikilaka *yayi*, mutindu bantu ya Pentecote.” “Beto ke kwikilaka *yayi*, mutindu ba-Baptiste.”

147 Mu ke kwikila Yayi samu ti Yawu kele Ndinga ya Nzambi! Mu ke tula ntembe na muntu nyonso na kusungika munu na Yawu. Beno me mona? Ya kele kieleka. Yayi kele Ndinga! Beno vwanda na Yayi, Yayi kele kieleka!

148 Na yina ba salaka dibuundu ya ntete, dibuundu ya Katolika ya Rome ya ntete. Mpe na kisika ya kubokila. . . yandi *évêque*,

yina ba vwanda bokilaka yandi ntangu nionso, ntangu yayi ba ke bokila yandi “Tata.” Ba ke salaka yawu kaka. Mpe bawu ke tuba awa, “Beno fwana ndima yawu, ti galette yayi *kele* Nzutu ya Klisto. Mpe, na ntama mingi, nganga-Nzambi kele nzambi, samu ti Nzambi kele ya kukangama na kuwa ndinga ya nganga-Nzambi yina ke soba kitini yayi na Nzutu ya Klisto.” Na yina bantu ya mayele mingi ke ndima yawu! Oh, la la! Oh, wapi mutindu. . .

¹⁴⁹ Kasi misambidi ya kieleka, ba-évêque ya kieleka, bikanaka na Ndinga. Bawu vwandaka kaka kuna na Lukutakanu ya Nicée, bawu simbaka Ndinga yina kaka kuna. Yinga, tata. Bawu kwisaka mutindu bambangi, mpe nionso yankaka, kasi bawu vwandaka na Ndinga yina. Bawu zolaka ve kusambila biteki na mutindu nionso.

¹⁵⁰ Mpe mu ke zola muntu mosi kutalisa na munu kisika Santu Patrick vwandaka Catholique ya Rome. Ya me vwandaka na kima ya mutindu yina ve! Yandi mangaka dibuundu yina ya Rome. Yandi vwandaka mwana-mpangi ya Santu Martin. Mu vwanda tanga awa, na . . . kento yina sonikaka . . . Hazeltine, Mama Hazeltine, *Mwa Bansangu ya Lukutakanu ya Nicée*, yandi tubaka ti yandi kwendaka na kalati na Oxford samu na kubaka kalati ya yandi, samu na kubaka, *Luzingu ya Santu Martin*, mpe muntu yayi tubaka, “Kasi ba kumisaka yandi ve santu na dibuundu ya Rome.” Kieleka ve, yandi mangaka kima yina! Mpe mutindu Santu Patrick salaka. Bantu yina bikanaka na Ndinga ya Nzambi tungaka balukolo ya bawu mosi, bawu kwendaka ntama na bima ya mutindu yina.

¹⁵¹ Ntangu yayi, beto ke mona, mutindu mosi ya kele bubu yayi. Dibundu ya Rome ke landila na basikwiti ya bawu ya ronde ya mutindu mosi, na kukwikilaka ti Klisto ke kulumuka mpe ke kota na kati. Mpe, beno kuwa, beno zaba ti nganga-Nzambi ke kunwaka vinu? (Ntangu, ba ke bakaka yawu mosi na yankaka, “Yandi ke lutisa mbungu ya vinu mosi na yankaka.”) Kasi, na mutindu ya mimpani, banganga-Nzambi ke kunwa vinu. Beno me mona? Beno kele kaka . . . Ya kele nyonso ya mimpani! Ya kele kaka kieleka. Ba ke kipe ve.

¹⁵² Ba ke tuba na beno, “Mu ke tuba na beno ve samu na Biblia.” Longi yina, to nganga-Nzambi, tubaka na munu kuna, yandi tubaka, “Tata Branham, nge ke meka na kuzonzila Biblia, mu ke tubila dibuundu.”

Mu tubaka, “Nzambi kele Ndinga!” Kieleka. Ntangu yayi, mbote mingi.

¹⁵³ Beto ke mona yayi, na kilumbu yayi, ya kele samu na yina dibuundu ya Katolika ya Rome fwana kwenda na dibuundu samu na kusambila. Ba me longaka bawu ti “Nzambi kele na kati ya galette ya ronde, Hostie na kati ya tabernacle.” Beno

me mona? Beno lenda mona ve ti yina ke bumpani? Ya kieleka, yawu yina.

¹⁵⁴ Beno lenda ve kumona bantu yina ke ndima kima—kima ya kuswaswana na Ndinga yayi kele mvwatu ya mutindu mosi? Biblia ke bokila ve, na Apocalypse 17, dibuundu ya Katolika “kento ya kindumba”? Ba ke bokila ve Yawu ba-Protestant mama ya . . . ti yandi vwandaka “mama ya bakento ya kindumba”? Kima ya mutindu mosi! Yandi ke mwangisa malongi na mbungu ya yandi ya kifuluka na busafu ya yandi ya kindumba, mvindu mpe nzanzi mingi, mutindu ya muntu ya fioti, na kisika ya Ndinga ya Nzambi ya moyo yina kele kieleka mpe ya kukondwa mvindu.

“O Nzambi, wila beto mawa,” ya kele kisambu ya munu.

¹⁵⁵ Irénée tubaka, mu sonikaka noti mosi awa yina yandi tubaka, yandi tubaka, “Ndinga ya Nzambi kele mutindu nkonga ya kitoko ya misanga ya nene yina ba tulaka na ngaanda samu na kusala kiteki ya Ntinu mosi ya nene, ya ngolo. Kasi,” yandi tubaka, “ba credo, ba-dogme, ba denomination, ke baka misanga yayi ya kitoko mpe ke sala mutindu ya yimbwa na yawu, mpe ke vuna bantu yina me zaba ve Ndinga. Yayi bawu ke sala samu na kubebisa banzila ya Nzambi mpe samu na kunata nsoni na zulu ya Yawu.” Alleluia!

¹⁵⁶ Ntangu beno ke meka na kusala Ndinga ya Nzambi kutuba kima mosi ya kufwanana na organisation ya beno, beno ke na kukatula misanga na Nzutu ya Ntinu ya nene mpe ke na kusalaka kifwanusu ya yimbwa, to kibulu, to ngulu, to kima, na yawu. Mpe beno ke vuna yina zaba Ndinga ve.

¹⁵⁷ Alleluia! Ya kele na bayina kele na Mpeve ya Nzambi, yina ke telamaka samu na Ndinga yina me kituka nzutu. (Nzambi, matisa bandonga na beto.) Ndinga, kima yankaka ve kasi Ndinga! Beno baka Ndinga yina kisika Yesu tubaka na kati kuna, “Mazulu mpe ntoto nionso ke luta, kasi Ndinga ya Munu ke luta ve.”

¹⁵⁸ Kisika Yawu tubaka, “Beno botika na Nkumbu ya Mfumu Yesu Klisto”; bawu ke sala “Tata, Mwana, Mpeve-Santu,” banzambi tatu na Yawu. Bawu ke bakaka mitindu nyonso ya ba-dogme, mpe ke sala mitindu nyonso ya bima, mpe ke mwangisa maza na kisika ya kukotisa na maza. Bima nionso! Ba ke salaka na yawu bima ya mutindu na mutindu me salama na bantu, na kisika ya kutula yawu na Misanga, na kati ya Ntinu ya nene, Klisto.

Oh, Alleluia! Yina kele Nzambi yina me kituka nzutu, Klisto!

¹⁵⁹ Bawu ke bebisa banzila ya Nzambi. Ba ke bika bantu kukwisa na yinzo-Nzambi, bakento na bansuki ya kuzenga, ke tula maquillage, ke lwata bilele ya mansoni. Babakala mutindu nsusu me pola mingi na masa, ke bika kento kubenda bawu na

dikutu. Ke kwisaka na yinzo-Nzambi, mpe bula nsaka ya loto mpe bingo, mpe bima nionso ya kubeba. Mpe milongi mpe nionso yina kuna na bakumu, na bakento ya kikonga me lwata ba-maillot de bain mpe ke na kuzenga masa, ke kunwa makaya, mpe ba ke kukibokila bawu mosi “bisadi ya Nzambi”; ntangu tempelo yayi kele tempelo ya santu me biekama na Nzambi, ya ke vwanda na mvindu ya yinza ve. Ya kieleka. Kasi bawu bakaka misanga ya Nzambi mpe me sala ngulu na yawu, to kibulu, to yimbwa, to mpadi, to kima mosi, mpe ke disa na yawu muntu yina me longukaka ve, muntu yina me zaba kima ve.

¹⁶⁰ Matondo na nge, Doc. Mu vwandaka na mosi awa kasi mu banzaka ve na kusadila yawu, muswale mosi.

Yinga, yawu yina bawu ke salaka. Irénée vwandaka ya kusungama mingi—mingi.

¹⁶¹ Yinki Nzambi ke banza samu na nionso yayi? Ya kele kaka mutindu yina bawu mekaka na kutuba, “Oh, ya kele ve dyambu na Yandi”? Ya ke sala dyambu na Yandi! Ya ke sala dyambu.

¹⁶² Samu na yinki Yandi tubaka mambu yina Yandi salaka na ntangu yina? Samu na yinki Yandi tubaka mutindu yina? Ya kele diambu. Nzambi ke na nzila mosi.

¹⁶³ Yinki kana Moise tubaka, “Mu ke katula yimpu ya munu na kisika ya basapatu ya munu”? Yandi monaka ata fioti ve vision. Beno fwana kwiza na nzila ya Nzambi. Nzambi kele na nzila.

¹⁶⁴ Ya kele na mingi yina beto lenda tuba. Beto baka kaka Disonuku mosi awa. Mu kele na mingi ya yawu ya kusonika. Beto baka na Nombres 25, na mwa ntangu fioti. Nombres 25, beto tala kana yawu—yawu ke sala diambu na Nzambi, to ve. Beto tala kana ya ke sala, kana ba-credo yayi, ba-dogme (mpe nionso yina) ke sala diambu. “Yandi kele Nzambi ya mbote, Yandi kele kaka na zulu ya nionso.” Yandi ke sala yawu ve! Yandi ke tulaka ndilu mpe ke tulaka nsinga ya plombi, mpe beno fwana kukuma na Yawu.

Mpe Israel vwandaka zinga na Sittim, mpe bantu bandaka na kusala kindumba na bana ya bakento ya Moab.

(Beno kuwa!)

Mpe bawu bokilaka bantu na munkayulu ya banzambi ya bawu: mpe bantu vwandaka kudia, mpe bawu vwanda fukimina banzambi ya bawu.

Mpe Israël kangamaka na Baal-peor: mpe nganzi ya MFUMU kulumukaka na zulu ya Israël. (Kuyituka ve ti Yandi tubaka “Kusambila samu na bantu ya mutindu yina ve”! Huh?)

Mpe Mfumu tubaka na Moise, Baka bantwadisi nionso ya bantu, mpe diembika bawu na ntuala ya MFUMU na

mwini, ti nganzi ya nene ya MFUMU kukwenda ntama ya Israel.

Mpe Moise tubaka na bazuzi ya Israel, Beno kufwa muntu nionso ya yandi yina... kangamaka na Baal-peor.

¹⁶⁵ “Beno kufwa mosi na mosi ya bawu!” Nzambi zola kuvwanda Nzambi, mpe kana Yandi kele ve Nzambi Yandi ke vwanda ve kisika ya zole. Yandi fwana ve kubika Baal (mpe mwa dogme yina me sala na bantu, mpe mwa dibanza ya muntu mosi, to mwa dibanza ya credo mosi, to dibanza mosi ya—ya denomination) ke telama na nzila ya Yandi, Yandi kele Nzambi mpe Yandi kele na lenda na kubasisa na matadi yayi bana ya Abraham. Yandi ke na nsatu ya kuvwanda ve na ba-denomination ya beno. Yandi ke na nsatu ya kuvwanda ve na ba-société ya beno ya nene mpe balukolo mpe nionso yina. Yandi ke baka yina Yandi lenda kuzwa na diboko ya Yandi, yina kele kima mosi ve, ke pema mupepe ya Luzingu na kati ya yawu mpe ya ke kuma kima yina ke sadila Yandi. Ya kele yina ke salaka Yandi Nzambi. Kieleka, ya kele mfunu samu na Nzambi.

Beno ke tuba, “Ya ke diambu ve.” Ya ke na mfunu! Ya kieleka, ya ke na mfunu.

¹⁶⁶ Pape Leo le Grand, yandi yalaka kubanda mvula 440 tii mvula 461. Oh, yandi banzaka ti yandi vwandaka sala kieleka yina vwandaka mbote, kwisaka na yinzo-Nzambi. . . Na ntwala yandi kuvwanda Victor, mpe yandi vwandaka mpuku, mpe. Mpe yandi kwisaka kuna, mpe wapi mutindu yandi kufwaka Baklisto mpe nionso yankaka.

¹⁶⁷ Mpe na manima nani bandaka nionso yayi, na kutulaka yawu kufwa bantu “yina me ndimama”? Beno zaba nani ya vwandaka? Santu Augustin ya Hippone, ya kele kieleka yina salaka yawu.

¹⁶⁸ Santu Augustin kuzwaka ntangu ya mbote mbala mosi, mutindu me tuba disolo, samu na kukuma muntu ya nene mpe kuvwanda ya kifuluka na Mpeve-Santu. Yandi vwandaka na manima ya lupangu kuna, na Lyons, na France, na lukolo ya nene kisika Irénée longukaka, mpe bayankaka mpe Santu Martin. Yandi vwandaka ya kuvwanda na lupangu ya lukolo yayi mpe Mpeve-Santu kwizaka na yandi, kasi yandi mangaka na kundima Yawu.

¹⁶⁹ Na yina yinki yandi kumaka? Mbala zole diaka mwana ya difelo kulutila yina yandi vwandaka na mbandukulu, yandi kwendaka mbala mosi kuna na Hippone, na Afrique, kuna yandi tulaka lukolo ya yandi. Mpe ya vwandaka. . .

“Lakisa munu!”

¹⁷⁰ Mu lenda nata beno na disolo. Yandi vwandaka yina ndimaka mpova ya yandi samu na yawu, ti “Ya vwandaka mbote mingi na kufwa eretiki nionso yina ke wisana ve na ba-dogme

ya dibuundu ya Rome,” Santu Augustin ya Hippone. Ya kele na Biblia ya lukolo awa, to muntu yina me tangaka disolo, zaba ti ya kele kieleka, beno telemisa diboko ya beno? Yinga, beno me mona? Kieleka ya kele. Santu Augustin ya Hippone, ya vwandaka yandi zengaka nkanu ti “Ya vwandaka mbote mingi na kufwa ba-eretiki yina ke kuwisana ve na dibuundu ya Rome.” Na kundimaka malongi ya bumpani, ya kukwendaka ntama na Biblia, mpe kutula kisambu nzambi-mwini. Beno zaba kikuma Buklisto kele. . .

¹⁷¹ Beno zaba kisika beno me kuzwa Nowele? Klisto butukaka na Ngonda ya yiya, kasi yinki bawu salaka? Systeme ya mwini me lembama ntangu yayi mutindu ya ke na kwenda ntama, konso kilumbu ya ke kwenda mwa yinda mingi, to mwa nkufi fioti, mpe mwa nkufi fioti, mpe kubanda kilumbu ya makumi zole tii na kilumbu ya makumi zole na tanu ya kele ntangu nzambi-mwini kuzwaka mbutukulu ya yawu. Ya ke kaka pene ya bilumbu tanu kuna, ya ke ntangu yina ba vwandaka na yinzo ya cirque ya Rome na ntangu yina, nkinzi ya mbutukulu ya nzambi-mwini na ntangu yina. Mpe ntangu yayi beno me mona yina beno me kuzwa ntangu yayi? “Ba tubaka sala yawu ‘nzambi-mwini,’ beto baka yawu ‘Mwana ya Nzambi.’” Mpe nionso yina kele bumpani na kubanda! Mpe bantu na babala-bala na basapatu ya bawu ya yinda, mpe ba ke mata mpe ke kulumuka na babala-bala, mpe ke na kwenda na bamagazini.

¹⁷² Mpe awa kilumbu yankaka yina kento ya munu vwandaka tuba na munu, “Muntu mosi tubaka, ‘Mu zaba ve yinki ya kubaka Papa.’ Yandi tubaka, ‘Mpangi-bakala ke pesa yandi mulangi mosi ya whisky, mpe yina yankaka tubaka ti yandi ke pesa yandi mwa champagne.’ Mpe mosi tubaka, ‘Mbote, mu ke pesa mwa nsaka ya poker.’” Nkinzi ya Nowele, kisambu ya bumpani, ya diabulu! Mbote mingi.

¹⁷³ Kasi Augustin ndimaka yawu. Kana beno zola kutalisa na Schmucker, bisono ya Schmucker, S-c-h-m-u-c-k-e-r-s, *Kusungika Ya Nkembo* ya Schmucker, tala yina ya me tuba, ti, “Kubanda ntangu yina Santu Augustin ya Hippone zengaka nkanu yayi samu na dibuundu ya Catholique, ya zibulaka mielo pwelele samu na bawu na kufwa nionso yina ba zolaka na ntangu yina, yina mangaka dibuundu yina ya mimpani. Mpe kubanda ntangu ya Santu Augustin, pene ya bamvula nkama tatu na manima ya Klisto, tii na mvula 1850, ba kufwaka bantu mingi na Irlande, ya vwandaka na makumi nana na sambanu ya mafuku ya ba-Protestant yina kufwaka na nzila ya dibuundu ya Katolika. Ya kele na ntangu ya bambangi ya Rome, ‘Makumi nana na sambanu ya mafuku.’” Ntangu yayi beno swana na muntu ya masolo, yandi kele yina tubaka yawu. Mu ke vutukila ndinga ya yandi. “Bayina nionso ke wisana ve na dogme ya Catholique!”

174 *Catholique* ve, mpova catholique, ba me—ba me lunga ve samu na nkumbu yina. Ba kele mimpani ya Rome.

175 Ve bantu ya ntalu yina. Ya kele na makumi ya mafunda ya bantu yina kele na ngaanda kuna, kaka kieleka mutindu bawu. . . kusambila biteki yankaka kele. Bawu ke banza ti bawu ke sambila Nzambi, na ntangu (ba ke vutuka na Ndinga) bawu kele na kiteki na biteki bisika nionso. Beno me mona!

176 Mbote mingi, ya vwandaka dog- . . . dogme, ba-dogme ya ba-Romain. Mpe, beno kuwa, mu zola tuba kima mosi awa. Mu lutaka yawu.

177 Na mvula ya 1640, na mvula ya 1640, ntangu ba bandaka na kufwa bantu na Irlande, na nsi ya luyalu ya ba-Romain juriste yayi mpe banganga-Nzambi, nkama mosi ya mafunda ya bandimi ya Santu Patrick kufwaka. Kana Santu Patrick vwandaka muntu ya *Catholique* ya Rome, na yina samu na yinki bawu fwaka bantu ya bawu? Ba vwandaka bisadi ya kompani, mpe nionso yina. Ya kieleka. “Nkama mosi ya mafunda,” na ntangu ya bambangi, “ti bawu kufwaka samu ti bawu wisanaka ve na malongi.”

178 Mu vwandaka na mwa mabuundu ya Santu Patrick na Irlande ya Nord. Yinga, tata. Mu kuzwaka ntangu ya mbote ya kumona yawu. Yawu vwandaka kaka mpusu ya nene. Ba vwandaka ve na biteki ya bawu ya kuzangula na zulu, mpe kutiamuna bima na makulu ya bawu, mpe vwandaka futa bantu yina samu na kuvutuka mpe kukota na kiteki yina. “Marie, mbote, Marie, mpe mama ya Nzambi,” kima ya mutindu mosi na yina bawu salaka na Astarté (kinganga), mpeve ya Marie.

179 Kaka bamvula zole to tatu me luta dibuundu ya *Catholique* me banda dogme ya malu-malu ti “Marie kuvumbukaka na lufwa mpe kwendaka na Mazulu.” Bantu yikwa ke bambuka moyo na yawu? Oh, beno nionso ke bambuka yawu, kieleka, bazulunale vwandaka ya kifuluka na yawu. Ba-dogme! Ya me tungama na zulu ya ba-dogme, mpe ata ditona ya Kieleka kisika mosi ve.

180 Ntangu yayi, beno ba-Protestant kele kaka yimbi, yina me manga na kubaka Ndinga ya Nzambi. Ya kele dogme ya dibuundu ya ba-Protestant mutindu mosi ya kele dogme ya dibuundu ya *Catholique*, mpe beto nionso ke na kifu tii kuna beto ke vutuka na Ndinga ya Nzambi ya moyo! Ya kieleka.

181 Beno ba-Assemblée de Dieu, beno ba-Pentecotiste, ba-Unitaire, to nionso yina beno lenda vwanda, beno vutuka na Ndinga ya Nzambi! Beno basika na biteki ya ba-denomination yayi awa, ba-sphinx ya denomination. Ba ke lokama bawu mosi (mpeve ya diabulu) na kati ya biteki ya ba-denomination yayi. Beno zaba yawu? *Denomination* kele “kiteki”!

Beno ke tuba, “Nge kele Muklisto?”

“Mu kele Presbyterien.”

“Nge kele Muklisto?”

“Mu kele Methodiste.”

“Nge kele Muklisto?”

“Mu kele muntu ya Pentecote.”

¹⁸² Yina zola tuba ve yina beno kele “ngulu” to “yimbwa” to “mufeti,” kele dyaka ve na kusala na Yawu. Ya kele kieleka. Yina beto ke na yawu nsatu bubu yayi kele: kuvutuka na Ndinga ya Nzambi!

¹⁸³ Ntangu yayi, bisadi yayi ya magazini mpe bantu yayi ya ntalu ya Irlande ya Nord, kana Santu Patrick . . . sika vwandaka balukolo ya yandi nionso. Beno zaba, nkumbu ya yandi vwandaka Patrick ve? Nkumbu ya yandi vwandaka Succat. Yandi yibaka yandi mwana ya fioti; bawu kufwaka bampangi ya yandi ya bakento. Mpe yandi vutukaka na manima, samu yandi longusaka bayimbwa samu na kulanda bangulu mpe nionso yina, yandi—yandi—yandi—yandi salaka yawu, ntangu yandi salaka yawu, na yina bawu . . . yandi monaka nzila ya yandi na tata ya yandi mpe mama ya yandi. Mpe yandi bandaka lukolo mosi. Mpe lukolo ya Irlande ya Nord ke ndimaka ata fioti ve pape mutindu kilandi ya nene ya Nzambi, bawu kwikilaka yawu ve. Bawu bikalaka na Ndinga. Nzambi sakumuna santu yina ya lusakumunu, Santu Patrick, muntu ya nene.

¹⁸⁴ Mpe beno ke kuwa bawu ke tuba ti “Santu Patrick basisaka banioka nionso na Irlande.” Beno tanga disolo mpe beno tala yinki ya vwandaka. Santu Patrick vwandaka kwikila na kuzonza na bandinga ya malu-malu. Santu Patrick vwanza kwikila na kusimba banioka to kunwa manganga ya yimbi yina ke kufwaka; mpe ntangu yandi lendaka lokota nioka mpe kulosa yawu ntama na nzila ya yandi, bawu tubaka, “Yandi basisaka banioka na Irlande.” Yawu vwandaka samu yandi kwikilaka na kusimba banioka, mpe kima mosi ve ke niongisa bawu. Yinga, oh, ya kieleka.

¹⁸⁵ Bawu vwandaka ve na bayina . . . na ba-sanctuaire yayi ya nene. Mpe yinki—yinki santu zolaka . . . Yinki Irénée zolaka sala bubu yayi? Yinki Santu Patrick ke sala bubu yayi, samu na kumona bankama ya mafuku ya ba-dollars me baka kisika na malongi ya Catholique ya Rome, samu na kutunga bayinzonzambi ya nene mpe biteki ya ba-million ya ba-dollar mpe bima nionso kaka mutindu ba-Protestant ke na kusala?

¹⁸⁶ Mu salaka nsamunu mosi kilumbu yankaka yina mpe ya yangisaka muntu nionso, ya kele samu na yina mu ke na kusalaka bande yayi. Beno bika bawu kaka, bampofo ke twadisa bampofo, beno bika bawu kubwa na dibulu. Ya kele kaka kima yina beno lenda sala, beno me mona. Ntangu mu tubaka na bawu samu

na balubokilu ya autel, ya me vwandaka ve na kima ya mutindu yina na kati ya Biblia mutindu “balubokilu na autel.”

¹⁸⁷ [Kisika ya mpamba na bande—Mu.] . . . ya busantu ya Yandi. Na kukikulumusaka beto mosi na lufwa ya Yandi, na kutalaka ti beto kele kima mosi ve, na yawu Mpeve-Santu ke kwisa mpe ke zangula beto. Mpe beto ke tula kivuvu na beto mosi ve, samu beto lenda sala kima mosi ve, kasi na Yandi beto lenda sala bima nionso.

¹⁸⁸ Beto, na kifwanusu ya Yandi, kifwanusu ya Nzambi ya moyo. Yinki beno ke sala . . . Ntangu beno ke kukipesa beno mosi na Nzambi mpe Nzambi ke kwisa na kati ya beno, yinki ya ke sala beno? Kifwanusu ya Nzambi ya moyo. Kiteki ya kufwa ve yina me vwandaka na nsongi; denomination mosi ve kuna na quartier général na Washington, na—na—na Kimvuka ya Mabuundu; huh-uh, ve, yina ke kiteki ya kufwa, kiteki ya kufwa mpe credo ya bantu ya kufwa. Kasi kifwanusu ya moyo na kati ya muntu!

¹⁸⁹ Muntu mosi vwandaka longa kilumbu yina, to vwandaka na mwa noti mosi, mpe muntu mosi tubaka ti “Kana muntu me vuluka ve, mpe. . . Kana bakala vwandaka ya kuvuluka mpe kento ya yandi vwandaka ve ya kuvuluka, bawu ke kwenda na Enlevement? Kento yango lendaka kwenda ve na Enlevement, ya ke vwanda ve na kima ya mutindu kento yina ke kwenda na Enlevement samu ti bawu kele mosi.” Buzoba! Yesu tubaka, “Ya ke vwanda na zole na mbeto, mpe Mu ke baka mosi mpe ke bika mosi.” Yawu ke diambu ya muntu yandi mosi na Nzambi, na kupesaka nzutu *ya nge*; kana mama, tata, bana, kima yankaka me yamba Yawu to ve. Amen!

¹⁹⁰ O Nzambi! Yinza yayi ya kubeba, ya mvindu, ya nzanzi mingi; mabuundu yayi ya mvindu, ya nzanzi yina ba me bokila mabuundu; ba-organisation yayi ya mvindu, ya nzanzi; ba-credo yayi ya mvindu yina ke telemina Ndinga ya Nzambi. O Nzambi, nata mwa muntu mosi ya kukikulumusa kisika mosi kuna mpe kusukula bawu, mpe kuzangula bawu na bisika ya Mazulu mpe kukitalisa Nge mosi, Nzambi ya Ngolo nionso. Amen. Wapi kima ya kubeba ya ke vwanda!

¹⁹¹ Beto kele ya kuvukana na busantu ya Yandi. Beto, na kifwanusu ya Yandi, beto kele bifwanusu ya moyo ya Nzambi ya moyo. Na yina, yina me kufwa na yandi mosi, me vumbuka na lufwa na Yandi, (ntangu yayi beno kuwa, beno kuwa yayi), Ndinga na Yandi me kuma diaka muntu na kati ya *beto*. (Oh, Mpangi Neville!) Tala! Yinki ya kele? Disolo ya luvunu ve, nzambi ya mabanza yina me vwanda kuna, kasi Nzambi ya moyo. Yinki kele Nzambi ya moyo? Ndinga na kati ya beno ke na kusala Yawu kieleka. Fiou! Nkembo na Nzambi! Oh, mu zaba ti beno ke banza ti mu kele exalté, mu banza ti mu kele. Kasi, oh, mpangi-bakala, beno ke mona yawu? Beno nunga konso denomination,

beno nunga bumpani nionso, Nzambi ya moyo me monisama na kati ya tempelo ya moyo, mpe Ndinga ya Nzambi (yina kele Nzambi) me kuma muntu na kati ya beno. Samu na yinki? Beno me vwanda na bisika ya Mazulu, beno me nunga bima nionso, na Klisto Yesu. Amen!

Oh, mu ke zolaka Yawu. Mu fwana lemuka kima mpe kukwenda na ntwala.

¹⁹² Ntangu yayi, beno kuwa. Na yina ya fioti na kati ya bakwikidi ya Yandi ata ti bantangu yikwa—yikwa, to nani—nani, fioti, to nionso yina beno kele, ya fioti na kati ya bakwikidi ya Yandi (na kati ya Yandi) me kuzwa bampeve nionso ya yimbi na nsi ya bawu. Beno me mona? Beno tala! Klisto kele Yintu ya Nzutu. Ya kele kieleka? Mbote, kisika Yintu kele na Yawu. Nkembo! Kisika yintu ya munu ke kwenda ya ke nata nzutu ya munu na yawu. Mpe kisika Yesu kele, Dibuundu kele na Yandi. Amen! Yandi ke basika ve na Ndinga ya Yandi; Yandi ke bikana na kati ya Ndinga ya Yandi, ke tala na zulu ya Yawu, samu na kumonisa Yawu. Dibuundu ya Yandi kele na Yandi.

¹⁹³ Mpe, beno tala, beno ke tuba, “Kasi, Mpangi Branham, mu kele yina kele ya kulutila fioti.” Yawu yina bitambi ya makulu ya Yandi. Kasi, beno bambuka moyo, Yandi nungaka na beno, nungaka na beno konso kitini ya yawu, ata ti beno kele bitambi ya makulu ya Yandi. Bimbevo nionso, bampeve nionso ya yimbi, ngolo nionso, ata ti lufwa yawu mosi, kele na nsi ya makulu ya beno, na nsi ya *beno*. Nkembo! Mu ke na nsatu ve mutindu mu vwandaka na bamvula makumi tanu na zole na suka yayi. Yayi ke Kieleka. Kana mu lenda nata yinzo-Nzambi yayi na kumona yawu, mpangi-bakala, beto ke vwanda yinzo-Nzambi ya lunungu. Bakwikidi kati na Yandi, bampeve ya yimbi nionso kele na nsi ya Yandi. Oh, nkembo!

¹⁹⁴ Mu ke tala fioti, mu ke banda diaka na ntangu yankaka.

¹⁹⁵ Beno kuwa, beno kuwa yayi. Beno ke tuba, “Mpangi Branham, mu kele na ngolo ve.” Mutindu mosi na munu. Mu ke na ngolo mosi ve. “Mbote, Mpangi Branham, mu ke muntu ya kulemba.” Mutindu mosi na munu. Kasi mu ke tala ve na ngolo ya munu, ya kele ve ngolo ya munu. Mu ke na kutala na lutumu ya munu, beno me mona, lutumu ya munu ba pesaka na munu. Ya kele ve ngolo ya *munu*, mu kele na ngolo ve. *Yandi kele* ngolo, mpe mu—mu kele ya Yandi.

¹⁹⁶ Awa, mutindu yayi, beto tuba mutindu, awa train ke na kukulumuka na bala-bala, na bala-bala Quatrième mpe Broadway na Louisville, “zum, zum, zum, zum,” kaka na mbangu mutindu ba lendaka, ba-kilometre makumi yivwa na ngunga mosi na bala-bala yina, bantu nionso ke na kunwanina, ke pusa mosi na yankaka, ke na kuzatuka. Muntu mosi ya fyoti ke belama kuna, ke telemisa diboko ya yandi, mpe, mpangi, ke kangisa ba-frein. Mbote, mwa bakala yina kele na ngolo mingi ve samu

na kukanga mosi ya matoma yina, kasi yandi kele na lutumu. (Nkembo!) Ya kele ngolo ya yandi ve. Mbote, kana mosi ya matoma yina ke bula yandi, ya ke bebisa yandi. Kasi bika yandi telemisa diboko ya yandi! Samu na yinki? Minati-matoma ya ditoma ke zaba uniforme yina.

¹⁹⁷ Oh, mpangi-bakala, ba ke zaba uniforme yina, ke kangisa ba-frein. Samu na yinki? Beno tala lutumu ya yandi. Beno tala yina kele na manima ya yandi. Systeme nionso ya mbanza kele na manima ya yandi. Ngolo ya musiku ya mbanza kele na manima ya yandi. Uniforme yina ke talisa yawu. Yandi ke mutindu yankaka, yinga, tata, samu yandi kele kisadi.

¹⁹⁸ Yandi ke boka, “Telema!” Mbote, mosi ya matoma yina ke sala “zum,” mpe beno baka yandi mutindu yina. Kasi bawu ke sala mbote na kumeka yawu ve, beno tala yina kele na manima ya yandi. Ya ke kweta mpe ke sietumuka. Yandi ke tuba ve kima mosi, ya ke telemisa kaka diboko ya yandi. Ya ke salaka yawu, kieleka. Lutumu ya yandi ke katukaka na ngolo ya musiku, yawu nyonso kele na manima ya yandi. Yandi mosi, yandi kele ya kulemba, kasi yinki kele na manima ya yandi? Ya kele yina mbwetete . . . mvwatu ya yandi, yandi nionso me lwata uniforme.

¹⁹⁹ Yawu yina . . . kiteki ve, kasi yina muntu fwana lwata. Beto lwata binwaninu nionso ya Nzambi, amen, mpulusu mutindu yimpu ya kisengo, kinkuti yayi ya nene ya kisengo (yinda ya kielo) ya lukwikilu. Oh, mpangi-bakala. Ya kele ve yina yandi kele, kasi yina yandi ke talisa.

²⁰⁰ Yawu yina kisadi. . . ya kele ve mwa bakala yina me telama kuna, yandi ke kaka muntu mutindu bantu nionso, kasi yina yandi ke talisa!

²⁰¹ Kinwaninu ya beto kele Yesu Klisto. Yinga, tata. Bampeve ya yimbi nionso ke kanga ba-frein ya bawu na ntangu bawu ke mona Yawu. Ntangu ba ke mona kinwaninu yina ya Nzambi, mbotika ya kieleka ya Mpeve-Santu, amen, yina monaka Yawu me katuka mbala mosi na Kiti ya kimfumu ya Nzambi, yina me lwata bilele nionso ya mvumbukulu ya Yandi. Amen.

²⁰² Ve ti *beno* kele na ngolo, beno kele kima mosi ve, ya kele yina kele na manima ya beno. Samu na yinki? Beno kele ya kufwa. Beno me kuma muntu ya makesa, beno me kota na ngolo ya pulusu, beno ke keba musiku mpe ke yala bampeve yayi ya yimbi. Ya kele kieleka, beno kele na ngolo ya pulusu, kima ya muvimba kele na manima ya beno. Beno me mona, beno kele mutindu muntu ya kufwa, beno kele kima mosi ve, beno lenda kanga kima mosi ve. Kasi lutumu ya beno yina ba pesaka beno, samu ti beno me vumbuka mpe me kuvwanda na bisika ya Mazulu na kati ya Klisto Yesu, diabulu zaba yawu. Bima nionso ke kanga ba-frein ya yawu ntangu maboko yina ke mata.

²⁰³ Santu Martin, kilumbu mosi na yinzo ya lusambusu. . . Ya vwandaka na bakala mosi kuna yina vwandaka panza bima

(dyabulu), yandi vwandaka panza bima ya nene na kati ya bantu ya mutindu yayi, mpe bantu vwandaka kima mbangu, yandi vwandaka meka na kufwa bawu. Yandi vwandaka benda diboko-. . . vwandaka na binwaninu ya nene, meno, yandi vwandaka mwangisa bitini ya nene ya nsuni mutindu yayi na yina yandi vwandaka sala mambu ya buzoba.

²⁰⁴ [Kisika ya mpamba na bande—Mu.] . . . na kati ya basambidi. Mpe bilumbu yina yandi monaka na ntwala, mpe zabaka ti ya ke vwanda mutindu yayi, ntangu Yandi Yandi mosi me basika na dibuundu ya Yandi Mosi, dibuundu ya Laodicée. Yandi tubaka, “Tala, mu me telema na kielo mpe ke konkota.” Organisation yina basisaka Yandi na ngaanda, mpe ba me sala yawu bubu yayi, kasi Yandi me telama na kielo samu na kukonkota.

²⁰⁵ O Nzambi, bika ti binama ya Nzutu ya Yandi kuzaba bubu yayi ti beto kele na kati ya Dibuundu ya lunungu. Beto kele—beto kele na kati ya Klisto. Beto kele ya kuvwanda na zulu ya bima nyonso yayi ya yinza.

²⁰⁶ Samu na yinki bakento ya beto ke zola kuzenga bansuki ya bawu? Nzambi, yawu ke talisa ti kima mosi ke tambula mbote ve. Samu na yinki ba ke zola kulakisa bawu mosi mutindu bima yina ke talisa sexe? Samu na yinki bantu ya beto ke na nsatu ya bantima ya bawu samu na kuwa mwana-bakala ya mutindu Elvis Presley to—to mwa ba-Ricky yayi, to nionso yina, yina me telema kuna na guitare ya ntama mpe muziki yina ya ntama ya kukweta mpe ke sala ti bana ya beto ya bakento ke ningana mpe ke losa bakaleso ya bawu, mpe bima? Nzambi, mpe na manima mwana ya bakala yina ke tuba ti yandi kele Pentecotiste! O Nzambi, yinki kele. . . Beno tala Pat Boone yina kele ya Dibuundu ya Klisto mpe mambu nionso ya yimbi, ya mvindu. . . O Nzambi, ke na kubokila yandi mosi “na Dibuundu ya Klisto.”

²⁰⁷ Nzambi, beto me bakula ti kidimbu ya lutumu kele ve nkumbu ya denomination, kasi yawu kele ngolo ya mvumbukulu ya Klisto na lizingu ya konso muntu. Nzambi, bika ti bantu yayi awa na suka yayi kusala kingolo-ngolo na kukota na Yawu. Mpe kana bande yayi lendaka kwenda na yinsi kisika bantu kele, Mfumu, bika bawu zaba ti ya me tubama ve samu na kuvwanda na mayele ya yimbi, samu ti mu ke vwanda na foti munu mosi, kasi ti Dibuundu fwana vwanda na lunungu mpe fwana zaba kisika ya yawu. Ti ba ke mona kisika biteki yayi kele. . . Kisika dibuundu ya Catholique me basika pwelele mpe me sala yawu “kiteki,” ba-Protestant ke salaka yawu “organisation,” mpe ya ke kaka yimbi; ke manga Ndinga, “Ke lakisa mutindu ya kinzambi, kasi ke manga Ngolo ya yawu.” O Nzambi, wapi mutindu Ndinga ya Nge kele kieleka, Ndinga nionso!

²⁰⁸ Ntangu yayi beto ke sambila, Tata, ti Nge ke lemvokila beto masumu ya beto, mpe bika ti Nsangu yayi kukota na kati ya

bantima. Mpe bika ti bantu. . . Bika ti dibuundu yayi, mutindu mwa tabernacle yayi ntangu yayi kele na kukubama samu na kutunga dibuundu, bika ti bawu tala ata fioti ve na mwa kima ya kitoko, kasi kaka mbote mingi samu na kubumba bantu. Nzambi, bika ti bawu kwenda tala ata fioti ve mpe kutuba, “Beto kele ya tabernacle ya nene yina kele na muludi ya nene na zulu ya yawu.” Nzambi, bika ti yawu vwanda mwa mpusu. Bika ti bawu kuzimbana ata fioti ve na kutala Kima ya mfunu, ya Yesu Klisto. Bika ti Yandi kuvwanda Yandi yina ke fulusa tempelo ya bawu, mpe kuna ngolo mpe tiya ya Mpeve-Santu ke kubwa na autel ya bantima ya bawu. Kele kisika yina autel ya kieleka kele, Mfumu, kele na ntima ya konso muntu.

²⁰⁹ Mu ke sambila na suka yayi ti Ndinga yayi ke vwanda kilo mingi na autel ya ntima ya konso muntu tii kuna bawu ke vwanda ata fioti ve na kiyeka ya kukwenda ntama na Yawu, ti bawu ke vwanda na mayele mpe ke sala bukebi na Nsangu ya mbote, na kukwikilaka Bandinga; mpe bawu zibula ve ntima ya bawu na bangolo ya bampeve ya yimbi (to ba-sensation, to kuningana, to kudumuka, to—to mwa kumonisama mosi, mutindu mosi ya nzutu, to kima mosi ya mutindu yina), kasi na Mpeve ya kieleka, ya zola ya kieleka ya Klisto, kisika Yandi ke monisama Yandi mosi na zola mpe ngolo.

²¹⁰ Pesa yawu, Mfumu. Belusa bambevo mpe bantu ya mpasi. Beto ke lomba na Nkumbu ya Yesu. Amen.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

. . . Mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

²¹¹ Na bayintu ya beto ya kukulumusa, bantu yikwa ke tula ntima ya beno na zulu ya autel mpe kusala yawu kilanga ya Nzambi, ti Yandi lendaka kuna Ndinga ya Yandi na zulu ya autel ya ntima ya beno, yina ke nata luzingu ya mvumbukulu ya Klisto? Beno zola telemisa maboko ya beno mpe kutuba, “Nzambi, mu ke zola yayi na ntima ya munu ya muvimba?” Nzambi sakumuna bantima ya beno ya nzala, kumi na zole na kumi na zole.

Bika yawu kuna, bika yawu kuna,
Pesa kizitu ya nge na Mfumu mpe bika yawu
kuna;
Kana beto ke tula kivuvu mpe beto ke tula
ntembe ata fioti ve, ya kieleka Yandi ke

sadisa beto kuna;
Beto bika kizitu ya beto na Mfumu mpe beto
bika yawu kuna.

²¹² Ya kieleka na kati ya ntima ya beno, beno bambuka Klisto Mvulusi, beno bambuka moyo ti Yandi kufwaka samu na beno. Mpe kana beno ke kufwa na beno mosi, yina ke basisa nionso na nzutu ya beno, ke basisa nionso ya moyo ya beno, ke basisa nionso na ntima ya beno, bima nionso ya yinza yayi mpe biese ya yawu nionso, na yina Klisto. . . beno ke vumbuka na Yandi.

²¹³ Kana beno me kuzwaka ntete ve mbotika na Nkumbu ya Yesu Klisto, ya kele na baptistère ya kifuluka na maza awa. Mpe, ntangu beno ke basika na maza yina, beno ke basika na kutambula na Klisto na luzingu ya malu-malu. Beno kele ya kufwa na ntangu yina, beno kele dyaka ve. . . kudasuka mpe nyonso me kwenda. Beno kele kivangu ya malu-malu na Klisto. Na yina Yandi ke vumbula beno na Mpeve-Santu mpe ke tula beno na bisika ya Mazulu na Yandi mosi, ntama na zulu ya bangolo nionso ya yinza yayi.

²¹⁴ Ata mutindu beno kele fioti, kana beno kele mwa kento yina ke sukulaka bilele, kana beno kele—kana beno kele kaka mpangi ya bakala yina kele ve na ya yandi. . . zaba ABC ya yandi, ya ke sala ata luswaswanu ve nani beno kele. Beno kele kati na Klisto, na lunungu na zulu ya bima nionso. Mpe kimfumu ya nge kele na zulu ya konso mpeve ya yimbi mpe ngolo nionso yina diabulu ke na yawu. Nge ke na kati ya Klisto, na lunungu.

Na yina beno kele na bayintu ya beno ya kukulumusa:

²¹⁵ Mu zaba ti ya kele na mpangi-bakala yina me kwisa awa na suka yayi, Mpangi Slink (Mu ke kwikila ba bokilaka yandi “Sink, Jim Sink”), yina mu ke kwikila kuvwanda. . . Mpe mpangi ya beto ya bakala awa me ndimama na kuvwanda mulongisi ya Ndinga yayi. Ya kieleka ve, Mpangi Sink? Beto ke tentika maboko na zulu ya yandi na suka yayi kaka ntete beto sambila samu na bambevo, samu na kubieka yandi longi mosi (mosi ya bampangi ya beto) samu na kukwenda na bayinzo-nzambi samu na kulonga Nsangu ya mbote.

²¹⁶ Mpangi Jim Sink, nge ke kwisa awa na autel? Kwisa, Mpangi Neville. Mpangi Junie Jackson, nge kele awa? Mosi ya balongi yankaka ya Lukwikilu yayi?

²¹⁷ Mpangi Jim Sink awa ke kwikilaka na Nsangu ya mbote yayi yina beto ke longaka, Mwana ya Nzambi, samu na kukwikila ti Yandi kele kieleka Mwana ya Nzambi yina me butuka na mwense. Ya kieleka, Mpangi Sink? [Mpangi Jim Sink me tuba, “Amen.”—Mu.] Beno ke kwikila ti Yandi kufwaka mpe vumbukaka dyaka kilumbu ya tatu, butatu na zulu ya nionso, mpe yina me vwanda na diboko ya kibakala ya Nzambi, na kati ya ngolo ya ngolo ya Nzambi na zulu ya Mazulu, ke zinga samu na kusambidila beto? [“Amen.”] Beno ke kwikila na mbotika ya

masa na Nkumbu ya Yesu Klisto samu na mulemvo ya masumu? [“Amen.”] Beno ke kwikila na mbotika ya Mpeve-Santu kaka mutindu Nzambi ke pesa Yawu, na bidimbu mpe mambu ya ngitukulu na kulanda mukwikidi? [“Amen.”] Yandi ke kwikila yawu. Mpe mu ke kwikila ti yandi vwandaka na luzingu yina me lunga ve na ntwala ya bantu. Yandi ke longaka awa na dibuundu, bambala mingi samu na bawu awa, mpe mu ke mona ti, “muntu ya mbote ya Nzambi.”

²¹⁸ Ntangu yayi, samu na dibuundu yayi, ya kele na ata mpova mosi na kati awa, muntu mosi yina kele na diambu na zulu ya Mpangi ya bakala Sink? Beno tuba yawu ntangu yayi to ntangu nyonso beno vwanda swi. Bantu yikwa ke kwikila yawu na malongi ya Nsangu yayi mpe Ndinga yayi ti Mpangi Sink. . . mpe beno ke kwikila ti na nzila ya kimbangi ya Mpeve-Santu, ti Mpangi Sink lendaka kuzwa lusakumunu mpe ti ba lendaka fidisa yandi na dibuundu yayi awa mutindu mulongi ya Nsangu ya mbote, samu na kuzabisa Bansangu yayi mutindu me longama na suka yayi, na bisika nionso yandi lenda kwenda na yinza Mfumu ke tinda yandi? Beno telemisa maboko ya beno mpe beno tuba, “Mu ke sambila samu na nge, Mpangi Sink.” Nzambi sakumuna nge.

Beto kulumusa bayintu ya beto.

²¹⁹ Mpangi Neville, kana nge ke tentika maboko ya nge na zulu ya Mpangi Sink na yina nge ke tentika diboko ya nge na zulu ya Biblia.

²²⁰ Tata ya beto ya Mazulu, beto ke nata na Nge, na suka yayi, muntu yina basikaka na kubeba ya yinza yayi, yandi me kukitala yandi mosi mutindu muntu ya kufwa na yandi mosi mpe me ndima Klisto mutindu Mvulusi, me botama na Nkumbu ya Yesu Klisto, me telama na nsilulu ya kuyamba Mpeve-Santu, mpe ntangu yayi na bisika ya Mazulu, mpe ke kuwa lubokilu na luzingu ya yandi na ministere ya yandi.

²²¹ O Nzambi, mutindu bakuluntu ya dibuundu yayi, mutindu kimvuka mpe ba-surveillant général mpe nionso yina, samu na kutala mbote mameme ya Mpeve-Santu me pesa beto na kukeba, mameme ke telemisa diboko ya bawu ti ba zaba ti Mpangi Sink, “ti yandi kele muntu ya kudedama,” beto ke tula maboko ya beto na zulu ya yandi, mutindu Mpangi Neville mpe munu, mutindu bakuluntu ya Nge, mpe na nzila ya yayi beto ke sambila kisambu ya lukwikilu mpe beto ke bieka Mpangi Jim Sink na ministere ya Yesu Klisto. Pesa yawu. Bika yandi vwanda ya kufulukuka na ngolo ya Nzambi. Bika yandi kukakula ata fioti ve. Bika yandi nunga mioyo samu na Nge.

²²² Mpe, Nzambi, beto ke sila kukwikama ya beto mpe kimpangi ya beto na yandi, samu na kusimbisa yandi kisika nionso yandi kele, na kisambu, mpe na lusalusu, mpe konso mutindu yina beto lenda sala. Yamba yandi, O Nzambi, mutindu beto ke lakisa

yandi na Nge. Na Nkumbu ya Yesu Klisto, Mwana ya Nzambi. Amen. Amen.

223 Na maboko ya beno na zulu ya Ndinga, mpe kuna Mpangi ya munu Sink, mu ke tuma nge mpangi-bakala kati na Klisto mpe mbundana ya beto, na Nkumbu ya Yesu Klisto. Amen. Nzambi sakumuna nge. Mbote mingi. Mpe dibuundu me tuba, “Amen.” [Dibuundu me tuba, “Amen.”—Mu.] Nzambi sakumuna beno. Ya kele na mingi ya kusala na Nsangu ya mbote, na mfunu mingi, beto kele na manima ya nge nkama mosi na zulu ya nkama na nionso yina beto lenda sala samu na kusadisa. Nzambi sakumuna nge.

224 Yandi kele ve ya kulutila mbote na kuvwanda. . . Oh, la la! Mu zola kumona muntu. Ya kele mbote. Yandi kele, mutindu mu me bakula ntangu yayi, yandi ke na kubakaka luyalu ya kutwadisa Tabernacle ya Busantu na Utica, Indiana, na yina yandi ke zingaka mingi ve kuna.

225 Ntangu yayi, beto tala. Oh, beto ke na yawu bampangi? Oh, mu banza ti beto ke na bambevo ya kusambila, mutindu yina ve? Mbote mingi, bawu. . . nge kabulaka mwa bakalati ya bisambu? Mbote mingi, beto bokila mwa bakalati ya bisambu na nswalu nionso, beto vwanda kaka swi mwa ntangu fioti. Beto me lutisa ntangu mingi. Beno lenda pesa munu baminuti kumi? Mbote mingi. Bakalati ya bisambu, beno bika bantu yina ke na kisambu. . . Tii wapi numero beno me kabula yawu, mosi?

226 Mbote mingi, kalati ya bisambu numero mosi, beno lenda kwisa, numero ya zole, numero ya tatu, numero ya yiya, numero ya tanu. Kalati ya bisambu numero mosi, zole, tatu, yiya, tanu, beno telema kaka awa, na nswalu nionso, kana beno lenda telema. Kana beno lenda ve, mbote, beto zaba, beto ke kwisa baka beno. Beto ke meka na kubaka nionso yina beto lenda sala. Mosi, zole—zole, tatu, yiya, tanu, sambanu, sambwadi, nana, yivwa, kumi; sambanu, sambwadi, nana, yivwa, kumi; mpe kaka zole me telama na zulu ya yawu. Kumi, kumi na mosi, kumi na zole, kumi na tatu, kumi na yiya, kumi na tanu. (Huh?) Bawu nionso, bakalati nionso ya bisambu, beno kwenda na lweka *yayi* yankaka, beno kwenda na lweka yayi awa, na lweka yayi kana beno zola.

227 Oh, Yandi kele mbote ve? Ntangu yayi, muntu nyonso kuvwanda kaka na buzitu mutindu beno lenda, pene ya baminuti kumi ntangu yayi, kaka pene ya baminuti kumi. Ntangu yayi, bayina kele na bakalati ya bisambu, beto me sala nsamunu yayi “Bantu yina ke zola ti ba sambila samu na bawu, bawu kwisa na bakalati ya bisambu ya bawu,” mpe na yawu beto lenda ve. . . Beno me mona, bawu ke landila na kuvutuka, mpe na manima bawu ke meka na kusadila makabu ya Nzambi mutindu dibaya ya Opera, kasi beto ke—beto ke kwikilaka ve na kusala yawu.

228 Beto—beto ke kwikilaka na kubika Nzambi na kusala Kisalu ya Yandi. Beno ke kwikila yawu? Bantu yikwa ke kwikila ti Nsangu yayi na suka yayi kele Kieleka? [Dibuundu me tuba, “Amen.”—Mu.] Matondo na beno. Matondo na beno. Nzambi sakumuna beno. Mu ke kwikila Yawu na ntima ya munu ya muvimba, moyo, mpe mabanza.

229 Ntangu yayi, ya ke monana ti beto ke na bantu pene ya makumi tanu awa yina ba ke sambila samu na bawu, kima ya mutindu yina. Ntangu yayi, beno kuwa. Ntangu yayi, mosi na mosi ya beno kele na kati ya Klisto. Beno kele na kati ya Klisto Yesu, na lunungu na zulu ya bimbevo nionso. Beno nionso yina kele na ndonga ya bisambu, kele Baklisto, mikwikidi yina me butuka mbala zole, beno telemisa maboko ya beno. Kisika ya beno kuna kele na kati ya Klisto. Beno kele yimeni na lunungu, mpe kima mosi kaka beno fwana sala ntangu yayi kele kundima mpe kukwikila yina Nzambi me tuba kele Kieleka.

230 Na mpasi mu ke sala ndonga yina samu na kuswasikisa mabanza, ya ke vwanda mbote mingi samu na kusala yawu, ya ke baka beto ntangu ya yinda. Ya ke vwanda ve samu na munu, mu ke kwikila ti mu lendaka vwanda awa kilumbu yankaka yina, mu ke kuwa kaka mbote. Mu ke kuwa kaka mbote. Mu zaba ti Yawu kele kieleka. Nkembo na Mfumu! Kasi *ntangu yayi* beto kele na kati ya Klisto, *ntangu yayi* beto ke baka kisika na kati ya Klisto. Amen! Oh, la la! Bima yayi mu me longa kele Kieleka? Kana ya kele, na yina Yandi ke kukitalisa Yandi mosi. Ya kele kieleka.

231 Bantu yikwa na kati ya beno kele na ndonga ya bisambu kele banzenza samu na munu? Mu zaba mingi ya beno, kasi bayankaka ya beno kele banzenza. Telemisa diboko ya nge, yina zaba ti mu zaba kima ve ya yimbi na nge, telemisa diboko ya nge; bisika nionso na ndonga, uh-huh, mbote mingi. Yandi kele Klisto? Beno ke kwikila Yawu? Beno fwana vwanda na lukwikilu, beno fwana kwikila Yawu. Kana beno ke kwikila Yawu ve, na yina Yawu ke sala ve. Beno fwana zaba kisika ya beno, beno fwana zaba kisika ya beno. Ya kele kieleka, Mpangi West? Ya kele kieleka. Beno zaba kisika ya beno, Klisto silaka “Bima yina Mu ke sala beno mpe ke sala yawu.” Nge ke kwikila Yawu na ntima ya beno ya muvimba.

232 Bakala yina me telema kuna ke na kifu na luketo ya yandi. Nge ke kwikila Yawu na ntima ya nge ya muvimba. Beno lenda ve kukota na ndonga ya bisambu, kasi beno lenda kwenda kuna mpe kuvwanda, ya ke kwenda. Mpe ya kele ve cancer. Vutuka mpe vwanda na yisi, yawu nyonso me suka. Mu me monaka ntete ve muntu yayi na luzingu ya munu. Kana beto kele banzenza, mpangi-bakala, beno telemisa diboko ya beno. Kana beto kele banzenza . . . Yinki kele diambu, yandi me beluka!

Na autel yayi awa, beno me kwikila?

233 Wapi mutindu samu na nge? Beto ke banzenza, mu zaba nge ve. Nzambi zaba nge. Nge ke kwikila ti mu ke kisadi ya Yandi? Nge ke kwikila Nsangu yayi mu ke longa? Yinki ke salama kana mu me tuba na nge mpasi ya mukongo ke bika nge? Nge ke kwikila Yawu na ntima ya nge ya muvimba? Tata Burkhart, nge ke vutuka na Ohio, nge me beluka. Yesu Klisto me belusa nge.

234 Nge kele awa ve samu na nge mosi, nge kele awa samu na muntu yankaka. Ya kele kento. Mpe yandi me katuka na Ohio, mpe, ya kieleka, nkumbu ya yandi kele Alice McVan. Ya kele kieleka. Yandi vwandaka na lipaso. Ya kieleka. Mpasi ya estomac mpe kimbevo ya cancer. Ya kele kieleka? Kwikila kaka mpe yandi ke beluka. Kwenda na ntuala mpe kwikila Yawu na ntima ya nge ya muvimba. Kwikila Yawu na ntima ya nge ya muvimba, yandi ke kuzwa yawu.

235 Wafaso? Mu zaba nge ve, beto kele banzenza. Ya kele kieleka? Nge ke kwikila ti mu kele kisadi ya Yandi? Beno ke kwikila ti beto ke nunga na Klisto? Kana nge ke kwikila, na kidi-kidi ya nge mpe na bampasi ya nge mpe nionso yina nge ke na yawu, na yina, Mama Allen, nge lenda vutuka na yinzo ya nge mpe beluka.

236 Mu banza ti beto kele banzenza, mutindu yina ve? Mu me monaka nge ntete ve. Yayi ke ntangu ya ntete yina beto me kutanaka, beto ke banzenza mosi na yankaka. Nge ke kwikila ti mu ke profete ya Yandi? Nge ke kwikila yawu? Nge ke na mpasi ya ba-rein. Ya kieleka, mutindu yina ve? Nge me katuka awa ve, nge me katuka kuna na Sud. Nge ke sambila samu na bana ya nge yina me vuluka ve. Yina kele bakala ya nge na manima ya nge. Yandi kele na bakala mosi na ntima ya yandi na suka yayi, yina yandi ke na kusambila kele nkundi ya yandi. Tala, mu ke mona muntu mosi, nge kele—nge kele nkundi ya mama ya munu mpe ya tata ya munu. Muntu mosi kwizaka awa yina ba ke bokilaka L. C. to S. T., to kima mutindu yina, S.T. to kima mosi, yina kele—yina kele mwana ya nge. [Mpangi Neville me tuba, “J. T.”—Mu.] J. T. . . . Nge yandi yayi, S. T. Ve, ya kele ve J. T., mu zaba. Ya kele mwa muntu, bansuki ya ndombi, mu monaka yandi ya kutelama kaka awa na ntuala kisika yandi kele ntangu yayi. Vutuka na yinzo, nge me kuzwa lombilu ya nge. Vutuka na yinzo.

237 Bakala yina kele awa na suka yayi, bakala yina me katuka kuna na Georgie? Yinga. T. S. Yinga. Mu me monaka ntete ve tata mpe mama ya nge na luzingu ya munu, mpe nge zaba ti ya kele kieleka, kasi mu monaka nge me basika, kaka awa na ntuala ya bawu kaka kuna. Mu zaba ti ya vwandaka yawu. Nge me kuzwa lombilu ya nge, kutula ntembe ve.

238 Beno nionso ke kwikila, na ntima ya beno ya muvimba? Ntangu yayi, yikwa? Beno nionso kele kati na Klisto. Beno ke tuba, “Yayi kele Nsangu ya mbote?” Ya kieleka yawu yina Yesu Klisto salaka. Ya kieleka yawu yina bantumwa salaka. Ya kieleka yawu yina Irénée na bayankaka me salaka. Ya kieleka.

Beno ke kwikila Yawu? Na yina beno kulumusa yintu ya beno.

239 Kwisa awa, kuluntu. Bantu mingi ke luta na ndonga yina mutindu yayi. Beto me baka zole to tatu na kati kuna. Beno kwisa kaka awa. Mpangi ya munu Neville yayi kele muntu ya Nzambi. Mu ke kwikila yawu.

240 Beto ke luta na ndonga yayi awa mpe beto ke sambila samu na bantu yayi, beto ke tentika maboko na zulu ya bawu. Beno nionso ke kwikila ti beno ke beluka, mosi na mosi ya beno? Muntu nionso na kati awa ke kwikila Yawu? Na yina beno kulumusa yintu ya beno ntangu yayi, beto kele na Dibundu ya lunungu.

241 Mfumu Yesu, mu zaba mpangi-bakala yayi, ya kele samu na yina mu tubaka kima ve na yandi samu na yawu. Mu zaba yina yandi zola. Mu ke sambila ti Nge belula yandi, Mfumu, mpe pesa yandi lombilu ya yandi. Na Nkumbu ya Yesu Klisto.

242 Tata ya Mazulu, na maboko na zulu ya ntwenya ya mpangi yayi, na suka yayi, beto ke lomba na Nkumbu ya Yesu samu na luvukulu ya yandi. Amen.

243 Oh, beno kele. . .

Tata ya Mazulu, pesa na Mpangi ya beto ya kento Dauch awa, mpangi ya kento ya luzolo, yina vwandaka nkundi ya kieleka ya beto awa, samu na dibuta ya munu mpe bankundi ya beto ya luzolo. Beto ke kwikila ti yandi mpe bakala ya yandi kele bana ya Nge. Mu ke sambila, Nzambi, ti Nge ke pesa yandi lombilu ya yandi na suka yayi. Na Nkumbu ya Yesu Klisto. Amen.

244 Nzambi, na Nkumbu ya Yesu, sakumuna Mpangi ya beto ya kento Bruce. Beto zaba, Mfumu, ti yandi kele kisadi ya Nge. Beto ke sambila ti Nge ke pesa yandi—yandi lombilu ya yandi. Na Nkumbu ya Yesu Klisto. Amen.

245 O Tata ya Mazulu, na kuzabaka ti—ti Nge kaka lenda belusa Mpangi-kento Blankco, beto ke sambila ti Nge ke sakumuna yandi mpe ke pesa yandi lombilu yayi, Mfumu. Na Nkumbu ya Yesu Klisto. Amen.

246 Tata ya Mazulu, na zulu ya mpangi ya beto ya kento beto ke tentika maboko ya beto na Nkumbu ya Yesu Klisto, beto ke lomba samu na kubeluka ya yandi samu na nkembo ya Nge. Amen.

247 “Bidimbu yayi ke landa bayina ke kwikila,” mpe beto ke tentika maboko ya beto na zulu ya mpangi ya kento yayi yina ke beluka. Na Nkumbu ya Yesu, pesa yawu, Mfumu. Na ntangu nzutu yayi ya kidi-kidi, yina ke ningana, me telama awa, Mfumu, na nsi ya lutwadusu ya Mpeve-Santu, mpe ya kulemba, kasi Nge ke Nzambi. Belusa kento yayi ya ntwenia, mu ke sambila, na Nkumbu ya Yesu.

248 Nzambi ya Ngolo nionso, pesa na mpangi ya beto lombilu ya yandi. Pesa yawu, Tata. Beto ke tentika maboko na zulu ya yandi mpe ke bwisa mbeni, yawu yina ke kotisa ndikila na moyo ya yandi, to ke tula kidimbu ya ndombe na mbunzu ya yandi. Bika ti yandi telama na lunungu na zulu ya yina na suka yayi, Mfumu, mpe bakula kisika ya yandi na Klisto Yesu. Mpe yandi ke kuzwa yina yandi ke lomba, na Nkumbu ya Yesu.

249 Tata ya beto ya Mazulu, na maboko ya kutentika na zulu ya mpangi ya beto ya bakala, na Nkumbu ya Yesu Klisto, pesa lombilu ya yandi. Amen.

250 Mwana-kento yayi ya luzolo, Tata, na Nkumbu ya Yesu bika ti Mfumu kuvwanda na kyadi, samu na Nkembo ya Nzambi beto ke lomba luvukulu ya yandi.

251 Nzambi, beto zaba ti ntima ke dila samu na mama yayi mpe ke dila samu na mwana ya yandi ya kento. Nzambi, pesa na lukwikilu ya yandi na suka yayi, mpe na yina tula yawu kaka na ntangu yayi, na kuzabaka ti yandi kele na ngolo na zulu ya yawu. Mpe ya ke salama, na Nkumbu ya Yesu Klisto.

252 Nzambi, belusa mwana yayi ya fioti ya bakala, beto ke sambila na Nkumbu ya Yesu Klisto.

253 Nzambi, Tata ya beto, beto ke tentika maboko na zulu ya mpangi ya beto ya kento mpe ke lomba na suka yayi Nge pesa yandi lombilu ya yandi. Na Nkumbu ya Yesu Klisto. Amen.

254 Tata ya beto ya Mazulu, mutindu mama yayi ya fioti me kwisa samu na kubaka kisika ya yandi samu na kubeluka ya nzutu, beto ke tentika maboko na zulu ya yandi mpe ke lomba kubeluka ya yandi. Na Nkumbu ya Yesu Klisto. Amen.

255 Na zulu ya mwa mwana yayi ya luzolo yina beto ke tentika maboko ya beto, na Nkumbu ya Yesu Klisto, beto ke lomba kubeluka ya nzutu.

256 Na Nkumbu ya Yesu Klisto, na maboko na zulu ya mpangi ya beto ya kento, bika ti Nge belusa yandi ntangu yayi.

257 Tata ya beto, Yina kele na Mazulu, bika ti Nkumbu ya Nge kusantisama, na zulu ya mwana yayi ya bakala beto ke tentika maboko ya beto. Na Nkumbu ya Yesu Klisto, bika yandi kwikila Yawu. Amen.

258 Tata ya Mazulu, na zulu ya mpangi ya beto ya bakala ya kikesa awa, Mfumu, kisadi ya Nge, muntu ya Nzambi, beto ke tentika maboko na zulu ya yandi ti beto ke kwikila. Na Nkumbu ya Yesu Klisto bika yandi baka kisika ya yandi ntangu yayi. Ntangu yayi, yayi kele mwana ya Nzambi, na ntangu ya nkembo kisika beto nionso ke suka.

259 Tata ya Mazulu, na zulu ya mpangi ya beto ya kento yina me basika na mpimpa mingi samu na kutambula na Nsemo, pesa, Mfumu, ti mwa moyo ya yandi ya kikesa kuzanguka na zulu

na suka yayi, na atimosifere ya Mazulu. Mpe pesa yandi—yandi lombilu ya yandi, na Nkumbu ya Yesu. Amen.

²⁶⁰ Tata ya Mazulu, na zulu ya mpangi ya beto ya bakala awa beto me tentika maboko na Nkumbu ya Mfumu Yesu, beto ke lomba lombilu yayi kupesama na yandi. Na Nkumbu ya Mfumu Yesu Klisto. Amen.

²⁶¹ Tata ya beto ya Mazulu, beto ke tentika maboko na zulu ya bébé ya Mpangi ya beto ya kento, mpe beto ke lomba ti yandi kuzwa lombilu ya yandi, Tata, mutindu beto ke tentika maboko ya beto na zulu ya yandi na Nkumbu ya Yesu Klisto.

²⁶² Tata ya beto ya Mazulu, beto ke tentika maboko na zulu ya mpangi ya beto ya kento, na Nkumbu ya Yesu Klisto. Bika ti yandi kuzwa lombilu ya yandi, na Nkumbu ya Yesu. Amen.

²⁶³ Tata ya beto ya Mazulu, mutindu mpangi ya beto ya kento ke luta na ndonga yayi mpe bika ti . . . beto ke tentika maboko ya beto na zulu ya yandi, bika ti Klisto ya Nzambi kukwisa pene-pene ntangu yayi mpe kubedisa bampasi mpe kupesa yandi mavimpi ya mbote. Amen.

²⁶⁴ Tata ya Mazulu, na zulu ya mpangi ya beto ya bakala, beto ke tentika maboko na zulu ya yandi mpe ke lomba ti na Nkumbu ya Yesu Klisto, ti Nge ke belula yandi na Nkumbu ya Yesu. Amen.

²⁶⁵ Tata ya Mazulu, na zulu ya mwana-kento yayi beto ke tentika maboko ya beto, mpe ke lomba Mfumu ya beto ya ntalu. Na Nkumbu ya Yesu Klisto, beto ke lomba kubeluka ya yandi. Amen.

²⁶⁶ Mfumu ya beto ya ntalu, beto ke tentika maboko na zulu ya mpangi ya beto ya bakala, na Nkumbu ya Mwana ya Nzambi, Yesu Klisto, Yina beto kele ya kulutila minungi na Yandi. Mpe beto ke lomba ti Nge pesa lombilu ya mpangi ya beto ya bakala, na Nkumbu ya Yesu. Amen.

²⁶⁷ Tata ya beto, na zulu ya mpangi ya mpangi ya beto ya kento, mwa soda yayi ya Kulunsi, Mu ke sambila, Nzambi, ti Mpeve ya Nge kukwisa na zulu ya yandi mpe kupesa lombilu ya yandi. Na Nkumbu ya Yesu Klisto. Amen.

²⁶⁸ Tata ya beto ya Mazulu, na zulu ya soda yayi ya kikesa ya Kulunsi, yandi me telema samu na Ndinga ya Nge na—na bantangu ya masawula mpe nionso yina, mpe diaka telemaka kaka na Ndinga, tambulaka kulutila munungi na Klisto Yesu. Pesa yandi lombilu ya yandi, Tata. Mu ke sambila kisambu ya munu mpe pesa yandi lusakumunu ya Nge, Mfumu, ti Nge ke belusa yandi mpe ke pesa yandi lombilu ya yandi. Na Nkumbu ya Yesu. Amen.

²⁶⁹ Tata ya Mazulu, bébé yayi lenda zinga ve na nganda ya Nzambi, kasi Nzambi lenda belusa yandi. Mu ke tentika maboko na zulu ya yandi mpe mu ke bwisa mbeni, na Nkumbu ya Yesu Klisto. Sakumuna mwana, mpe bika ti Nge sadisa yandi na

kukwenda na ntwala na Nkumbu ya Yesu Klisto. Amen. Minungi ya kulutula.

²⁷⁰ Tata ya Mazulu, samu na mpangi ya beto ya kento, yina beto ke tentika maboko na zulu ya Nkumbu ya Yesu Klisto, tabernacle ya Nzambi me kuma nsuni mpe me zinga na kati ya beto. Bika ti na nzila ya Nkumbu ya Yandi, Nkumbu ya mbote ya Mwana ya Nzambi yina, Yesu Klisto, pesa mpangi ya beto ya kento lombilu ya yandi. Amen.

²⁷¹ Mpangi ya beto ya kento Kidd, ntima ya nge kusakumuka. Tata ya beto ya Mazulu, mutindu mu me simba bakala yayi ya kiboba mpe kento yayi na maboko ya beto awa, yina longaka Nsangu ya mbote na ntangu mu vwandaka kaka mwana-bakala ya fioti, mwa bilumbu fioti me luta yina vwandaka kufwa na cancer; kunwana samu kukutana na yandi, mpe ngolo ya Nzambi me kulumuka na zulu ya bakala ya kiboba ya bamvula makumi nana mpe me belula yandi, ti badokotolo vwandaka na ngitukulu swi, ba lendaka ve kubakula yawu. Mu ke sambila ti Nge pesa lombilu ya yandi na suka yayi. Kento ya yandi ya fioti ya kusakumuka, Mfumu, yina me sukula na zulu ya dibaya samu na kutinda bakala ya yandi na ministere samu na kulonga Nsangu ya mbote yayi—yayi ya Menga ya Yesu Klisto. Pesa yawu, Mfumu.

²⁷² Sakumuna mwana ya bawu ya bakala, Junior, Mfumu. Beto ke sambila ti Nge ke belula yandi mpe ke pesa yandi ngolo, Mfumu. Yandi ke lusalusu ya bawu samu na kunata bawu na bisika nionso, samu na kutentika bamuswale. Ata ti bawu kele kiboba mingi ti bawu lenda diaka ve kukwenda na kilanga, kasi bawu ke kwendaka na balupitalu mpe na bayinzo, samu na kutentika bamuswale na zulu ya bambevo. Nzambi, Nge ke zitisa yawu, mu zaba ti Nge ke sala yawu. Sakumuna bawu mpe pesa bawu ngolo bilumbu mingi, Tata. Na Nkumbu ya Yesu Klisto. Amen.

²⁷³ Nzambi sakumuna nge. Yawu ke salama, Mpangi Kidd, yawu ke salama. [Mpangi-bakala na Mpangi-kento Kidd ke tuba na Mpangi Branham—Mu.] Nzambi kubaka lukumu. Amen. Yinga, yandi yina beto me sambila kuna na allo-allo.

²⁷⁴ Bakala mosi na kento ya bamvula makumi nana, mpe kuluta, lenda kwenda ve na bilanga mpe kutelama na chaire, bawu kele biboba mingi samu na kulonga mutindu yina, kasi ba ke landila kaka na kukwisaka awa samu na kubaka bapaké ya bitende ya bilele mpe ke fidisa yawu na bambevo mpe bantu ya mpasi, ba ke nata bawu na balupitalu mpe nyonso mutindu yina. Samu na kutentika yawu na zulu. . . Ba lendaka diaka ve kubasika mpe kusimbisa ministere na mutindu yina, kasi ba ke na kutambula na mutindu ya kulutula mbote ba lendaka. Ya lendaka sala ti beto bantwenia kuvwanda na nsoni ya beto mosi. Ya kele kieleka, kusala kima mosi samu na Klisto.

275 Beno bambuka moyo, na kiboba yayi awa, Mpangi Kidd, yandi vwandaka longa Nsangu ya mbote na ntete mu butuka. Ya kieleka, kuna vwandaka sambila samu na bambevo, soda ya kiboba ya kikesa. Mpe awa, kiboba, nge me kuma na bamvula yikwa, Mpangi Kidd? Bamvula makumi nana na mosi, ke landila diaka na kukwenda samu na Kimfumu ya Nzambi! Mpe kiboba mingi samu kutelama na chaire mpe kusimbisa nsangu mutindu yayi, kasi ke kwenda na lupitalu, na balweka ya bambeto, kisika ba ke na bakala mosi ke nataka bawu na ditoma. Mpe ba lendaka ve kutambula, na yina ba ke nata yandi na ditoma mpe ke bakila bawu kisika mosi, mpe bawu zole, bankwelani ya biboba, ke kwenda kuna mpe ke tentika muswale.

276 Ba vwandaka na nkundi ya luzolo mingi pene-pene ya kufwa kilumbu yina, mwana-kento, ba vwandaka tubila munu yawu. Beto sambilaka samu na bawu, mutekolo, beto kwendaka mpe tentikaka...Mwana me telema ntangu yayi. Nzambi kubaka lukumu!

277 Mpangi Kidd, ba bokilaka munu awa mwa ntangu fioti me luta, mu banza bamvula zole me luta, ya me vwanda, ti yandi vwandaka na cancer ya prostate, na bamvula pene ya makumi sambwadi na nana, to makumi nana, pene-pene ya bamvula makumi nana, na cancer ya prostate. Dokotolo me bika yawu kuna, kima mosi ve lendaka salama. Beto kwendaka nswalu, Billy mpe munu vwandaka nata ditoma na kupesaka bampangi, samu na kukuma kuna kisika yandi vwandaka. Mpe Mpeve-Santu tubaka na beto na kukwenda na suka yina. Beto ntangu nionso ke salaka yawu ve kaka kana beto me twadisama na kusala yawu. Mpe Mpeve-Santu tubaka, "Kwenda," mpe beto kwendaka kuna mpe tentikaka maboko na zulu ya kiboba yina, samu na kusambila samu na yandi. Mpe badokotolo lendaka ve kumona ata kidimbu ya yawu. Nkembo na Nzambi! Oh! Samu na yinki? Kisika ya beto kele na kati ya Klisto Yesu, tombokaka na zulu ya bimbevo nionso mpe bangolo nionso ya mbeni.

278 Oh, beno ke na kiese ve samu na Yandi?

Ya kele na bantu na kutala bisika nyonso,
 Bayina bantima kele nyonso na tiya
 Na Tiya yayi yina kubwaka na Pentecote,
 Yina sukulaka mpe vedisaka bawu;
 Oh, Ya ke na kupela ntangu yayi na kati ya
 ntima ya munu,
 Oh, nkembo na Nkumbu ya Yandi!
 Mu ke na kyese mingi ti mu lenda tuba ti mu
 kele mosi ya bawu.

Mu kele mosi ya bawu, mosi ya bawu,
 Mu ke na kyese mingi ti mu lenda tuba mu kele
 mosi ya bawu;

Mosi ya bawu, mosi ya bawu,
Mu ke na kyese mingi ti mu lenda tuba ti mu
kele mosi ya bawu.

Ata ti bantu yayi lendaka longoka ve samu na
kuvwanda,
To kukitombola samu na kuzabana ya yinza,
Bawu nyonso me kuzwa Pantekote ya bawu,
Kubotamaka na Nkumbu ya Yesu;
Mpe bawu ke na kutubaka ntangu yayi, bisika
nyonso,
Ngolo ya Yandi kele dyaka mutindu mosi,
Mu ke na kyese mingi ti mu lenda tuba ti mu
kele mosi ya bawu.

²⁷⁹ Bantu yikwa kele na kati ya bawu? Beno telemisa maboko ya
beno ntangu yayi.

. . . bawu, mosi ya bawu,
Mu ke na kyese mingi ti mu lenda tuba mu kele
mosi ya bawu;
Oh, mosi ya bawu, mosi ya bawu,
Mu ke na kyese mingi ti mu lenda tuba ti mu
kele mosi ya bawu.

Ntangu yayi kwisa, mpangi ya munu, sosa
lusakumunu yayi
Yina ke vedisa ntima ya nge na disumu,
Yina ke sala ngunga ya kyese kubula
Mpe ke bumba moyo ya beno na tiya;
Oh, ya ke na kupela ntangu yayi na kati ya
ntima ya munu,
Nkembo na Nkumbu ya Yandi,
Mu ke na kyese mingi ti mu lenda tuba ti mu
kele mosi ya bawu.

Mu kele mosi ya bawu, mosi ya bawu,
Mu ke na kyese ti mu lenda tuba mu kele mosi
ya bawu; (Alleluia!)
Mosi ya bawu, mosi ya bawu,
Mu ke na kyese mingi ti mu lenda tuba ti mu
kele mosi ya bawu.

Bawu vwandaka ya kuvukana na kivinga ya
zulu,
Bawu nyonso vwandaka sambila na Nkumbu
ya Yandi,
Bawu vwandaka ya kubotama na Mpeve-
Santu,
Na yina ngolo ya kosalu kwizaka;

Ntangu yayi yina Yandi salaka samu na bawu
 kilumbu yina
 Yandi ke sala samu na beno mutindu mosi,
 Mpe mu ke na kyese ti mu lenda tuba mu kele
 mosi ya bawu.

Mu kele mosi ya bawu, mosi ya bawu,
 Mu ke na kyese ti mu lenda tuba mu kele mosi
 ya bawu; (Alleluia!)
 Mosi ya bawu, mosi ya bawu,
 Oh, mu ke na kyese ti mu lenda tuba mu kele
 mosi ya bawu.

²⁸⁰ Ntangu yayi na yina beto ke na kuniunguta yawu, beto
 pesana mbote mosi na yankaka. Beto tuba:

Mosi ya bawu, mosi ya bawu,
 Mu ke na kyese ti mu lenda tuba mu kele mosi
 ya bawu; (Alleluia!)
 Mosi ya bawu, mosi ya bawu,
 Mu ke na kyese mingi ti mu lenda tuba ti mu
 kele mosi ya bawu.

²⁸¹ Beno ve? Beno tuba, “Amen!” [Dibuundu me tuba,
 “Amen!”—Mu.]

Mu kele mosi ya bawu, mosi ya bawu,
 Mu ke na kyese mingi ti mu lenda tuba mu kele
 mosi ya bawu;
 Mosi ya bawu, mosi ya bawu,
 Mu ke na kyese mingi ti mu lenda tuba ti mu
 kele mosi ya bawu.

²⁸² Mu lenda yimba nzila yayi?

Ata ti bantu yayi lendaka longoka ve samu na
 kuvwanda, (Bawu ke na Doctorat ya nene
 ve na Théologie, Doctorat ya Philosophie,
 beno me mona, ata bima ya nene ve, beno me
 mona.)
 Bantu yayi lendaka longoka ve samu na
 kuvwanda,
 To ya vwandaka ve ya kuzabana ya yinza,
 (Organisation mosi ya nene.)
 Bawu nyonso me kuzwa Pantekote ya bawu,
 Mosi na mosi ya bawu kubotamaka na
 Nkumbu ya Yesu;
 Mpe ba ke na kutuba ntama mpe bisika nionso,
 Ngolo ya Yandi kele dyaka mutindu mosi,
 Mu kele na kyese mingi ti mu lenda tuba ti mu
 kele mosi ya bawu.

Mosi ya bawu, mosi ya bawu,
 Mu kele na kyese mingi ti mu lenda tuba mu
 kele mosi ya bawu;
 Mu kele mosi ya bawu, mosi ya bawu,
 Mu kele na kyese mingi ti mu lenda tuba ti mu
 kele mosi ya bawu.

Oh, ve samu na mafuku nyonso ya wolo ya
 ntoto
 Mu ke bika kisika yayi ya ntalu,
 Ata ti muyunsi me...ke ndimisa munu
 bambala mingi me meka,
 Kasi mu kele na lukengolo na kati ya kivinga
 ya Nzambi,
 Kiese na zola mpe lemvo ya Yandi,
 Mpe mu ke na kuzinga na lweka ya Alleluia!

²⁸³ Oh, la la! Mu kele na kyese mingi samu na yawu. Beno ve? Beno kele ve na kyese na kuvwanda mosi ya bawu? Kaka mosi ya bawu, mosi ya bawu bantu ya kukikumumusa yina me basisa nionso na kati ya beno, me fukama (na ntwala ya kiteki ve), na ntwala ya Nzambi ya moyo, (ve na ntwala ya organisation mpe me tula nkumbu ya beno na buku), na ntwala ya Nzambi ya moyo, (ve samu na kutanguna credo), kasi kubika Ndinga kukuma nsuni na kati ya beno. Beno me mona, kaka yina. Mpe kukikumumusa beno mosi, mpe na manima na nzila ya yina Yandi me zangula beno na zulu, (ve samu na kuvwanda muntu ya lunangu, muntu ya lufundu, beno tuba “Mu kele *yayi, yina to yankaka*”), kasi na kukikumumusa, na lembami, mpe “wapi mutindu Yandi me vulusa muntu ya mawa mutindu munu, mpe wapi mutindu Yandi salaka yawu?” Ya ke mutindu yina Muklisto ya kieleka ke kuwaka. Beno ke kwikila yawu ve? Oh, Yandi ke ya kieleka mingi!

Ya kieleka, ya kieleka, Yandi ke ya kieleka
 mingi samu na munu!
 Oh, ya kieleka, ya kieleka, Yandi ke ya kieleka
 mingi samu na munu!
 Ata ti bantu kutula ntembe na Yandi, mu lenda
 zinga ve kukondwa Yandi,
 Ya kele samu na yina mu zola Yandi, mpe Yandi
 kele kieleka mingi samu na munu!
 Ya kieleka, Yandi ke ya kieleka samu na munu!

Beno yimba yawu!

Ya kieleka, ya kieleka, Yandi ke ya kieleka
 mingi samu na munu!
 Ata ti bantu kutula ntembe na Yandi, kasi mu
 lenda zinga ve kukondwa Yandi,
 Ya kele samu na yina mu zola Yandi, mpe Yandi
 kele kieleka mingi samu na munu!

284 Oh, mu ke na kiese mingi samu na yawu! Yinga, tata. Oh, mu ke na kiese mingi samu na nzila ya Nsangu ya mbote ya ntama yayi, yina ke na kuzinga na nzila ya Nsangu ya mbote ya ntama yayi ya nkembo.

285 Ntangu yayi, bankundi, tii kuna beto ke kutana na Kiti ya kimfumu ya Klisto dyaka, ntangu beno ke sambila, beno bambuka moyo na munu. Mpe Nzambi kusakumuna mosi na mosi ya beno. Mu kele. . . Mu lenda ve kutuba ti mu me kanga beno awa.

286 Ntangu yayi, samu na beno yina kele na muswale yina ba me tulula awa, mu tentikaka kaka maboko na zulu ya bawu na ntangu beto vwandaka sambila samu na bambevo, kana beno tala munu kusala yawu kaka ntangu Mpeve me bula. Mu me kota ve na ba-vision mingi, samu ti mu kele ya kulemba, ya kulemba mingi, beno zaba, mu me vwanda awa pene ya bangunga zole to tatu ntangu yayi, mu ke longa, mpe mu bandaka kaka na kutambula fioti na ndonga samu beno kumona ti Nzambi kele Nzambi. Beno me mona? Diambu yina lendaka salama ve, ya ngitikulu, ti bima yina ba lendaka kuzwa ve. . . Diabulu. . .

287 Ntangu yayi, beno bambuka moyo, mosi na mosi ya beno kele na ngolo kati na Klisto. Beno kele na ngolo ve, beno kele na *lutumu*, lutumu ya beno. Ba me zanguka beno kaka, na zulu mingi; samu na kuzanguka ve beno mosi, kasi Klisto me zangula beno. Kulutila mingi Klisto ke zangula beno, kulutila mingi beno ke kukikulumusya, beno me mona, beno ke kukikulumusya mingi. Na yawu wapi mutindu Yandi zolaka vulusa lumuntu ya mawa mutindu munu, wapi mutindu Yandi zolaka sala yawu? Kasi Yandi salaka yawu, mpe na yawu mu ke vutula matondo samu na yawu. Amen! Yawu ke mbote mingi!

Beto ke fukama na Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.

Nkumbu ya ntalu, (Nkumbu ya Ntalu!) O
Nkumbu ya mbote!
Kivuvu ya ntoto mpe kyese ya Mazulu;
Nkumbu ya ntalu, (Oh, Nkumbu ya ntalu!
Yandi kele kitoko ve?)
Kivuvu ya ntoto mpe kyese ya Mazulu.

288 Ntangu yayi, beno kuwa, beno zimbana yayi ve, beno yimba refrain, beno bika mu kuyimba couplet ya yawu. Beno me mona? Mu zaba ve kana mu lenda banza na couplet yina mu zola kuyimba na yawu, ya kele kima yina ke landa.

Beto ke fukama na Nkumbu ya Yesu,
 Beto ke fukama na makulu ya Yandi,
 Ntinu na bantinu ya Mazulu beto ke byadisa
 Yandi,
 Ntangu nzietolo ya beto ke suka. (Beno me
 mona?)

Baka Nkumbu ya Yesu na nge,
 Mutindu kinwaninu ya ngolo;
 Ntangu bampukumunu ke kwisa pene-pene ya
 beno,
 Beno niunguta kaka Nkumbu yina ya Santu na
 kisambu.

Kaka yina. Beno telemisa diboko yina mpe beno kuwa ba-
 frein ke sietumuka! Beno me mona? Beno me mona?

Niunguta Nkumbu yina ya Santu na kisambu.
 Nkumbu ya ntalu, O Nkumbu ya mbote!
 Kivuvu ya ntoto mpe kyese ya Mazulu;
 Nkumbu ya ntalu, (Oh, Nkumbu ya ntalu!) O
 Nkumbu ya kitoko!
 Kivuvu ya ntoto mpe kyese ya Mazulu.

²⁸⁹ Beto tuba yawu diaka, beto nionso kintwadi. Yinki beno ke
 tuba? Beto baka diaka nzila yina, na yina, “Baka Nkumbu ya
 Yesu na nge, mutindu Kinwaninu ya ngolo.” Beto yimbila yawu
 ntangu yayi na meso ya beto ya kukanga.

Baka Nkumbu ya Yesu na nge,
 Mutindu Kinwaninu ya ngolo ya mutambu
 nionso; (Ntangu yayi beno kuwa. Yinki
 kusala?)
 Ntangu bakumekama ke kwisila nge, (Yinki
 beno fwana sala?)
 Niunguta Nkumbu yango na kisambu.
 Nkumbu ya ntalu, (Nkumbu ya Ntalu!) (O
 Nkumbu kitoko!)
 Kivuvu ya ntoto mpe . . .

[Mpangi Neville ke na kutuba na Mpangi Branham—Mu.]
 (Ve. Ve, mu ke—mu kele fioti na ndinga ya kukangama, mu kele
 fioti na ndinga ya kukangama, na yina mu ke tuba ve . . .? . . .
 Beno zola kukwenda . . .? . . . Ve, ya kele nyonso ya kulunga, beno
 kwenda kaka na ntwala, ya kele mbote.)

Kivuvu ya ntoto mpe . . .

Mpangi Neville, pasteur ya beno, ntangu yayi.



BUKLISTO ME SWASWANA NA KUSAMBILA BITEKI KNG61-1217

(Christianity Versus Idolatry)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 17 ya Ngonda ya kumi na zole, na mvula 1961, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org